

漢
石
例
一









漢
石
例
一

劉寶楠錄



中
華
書
局

此 據 連 印 本
 書 排 有 此 本
 僅 有 此 本
 各 叢 書
 叢 書



漢
石
例

漢石例序

文生於義，不生於例也。義洽而例自立焉。故不獨春秋有例，若易、若詩、若書，無不有例。其例卽定於聖人精義之心，非有所比擬景傳也。爲文必當明例，碑志又文字之最謹嚴者，其例尤不可不講。元潘景梁、王止仲、明黃太沖，遞有所述，然取法不越昌黎，是謂昌黎以前金石之文，皆曠語也。先河後海，豈其然乎？古人副鍾範鼎，義專褒顯，面人儼事，不患本末不審，故款識流傳，類皆鑿樞行能，文質究宣，但主銘勳，不關記事。變金爲石，其義猶是，其例亦當猶是。秦漢以來，矩矱具存，可覆驗也。自昌黎一變而爲述事，後世史籍踳午，往往足資考證，故各家文集碑志，尤爲可貴。昌黎之功，誠亦不細，然不得因後掩前，反疑古人渾噩爲不達也。朱竹垞嘗謂墓銘莫盛於東漢，鄱陽洪氏隸釋隸續，其文其銘，體例非一，宜用止仲之法，舉而臚列之。竹垞旣未有成書，錢唐梁氏志銘廣例、吳江郭氏金石例補，嘉興馮氏金石綜例，撿采較博，舉例尙疏。至長洲王氏碑版廣例，雖上取秦漢，下訖中唐，其指乃主於摧毀漢人，專以文章正統與韓歐其言曰：漢碑版之在世亦多矣，或奧而蹟，或枝以蔓，雖或得焉，其所得常不敵其所失。又曰：漢碑版不皆出於文士，乖離析亂，人率其臆，未嘗有例也。噫！古人物勒工名一器，且不苟作，何有旌功寫德，託垂千億，乃

曾不得一文士爲之操觚乎。晚近尙欺心之學。且有尊標柳子厚、馬少監、張子野、黃夢升、諸文。以爲碑志正宗者。是并韓歐之例可廢。何論漢也。吾友寶應劉君楚楨。始本竹垞之意。豈以東京爲主。傳以經術。加之博證。纂爲漢石例六卷。蓋惟深通漢學。故能得其大義。義舉而例亦因之俱舉。文章家旣讀潘王之書。卽何可不進以此著也。楚楨爲端臨先生從子。少與儀徵劉孟瞻齊名。號揚州二劉。作令畿南。迭更盤錯。時遣人持券告貸京師。而一錢不以累民。比官元氏。貧愈甚。循聲亦愈起。訪獲縣境古碑甚多。其尤著者。則延熹封龍山碑。自來金石家。皆未見也。靈石楊君墨林。及弟子言。雅好金石。讀君書。喜且寶之。因請刻入連筠簞叢書中。而以校勘之事屬余。余旣獲交孟瞻。又獲交楚楨。故樂序行其書。楚楨又著有寶應圖經。精博與孟瞻揚州水道記。埒二劉之目。豈虛譽哉。道光十九年三月初六日。平定張穆序。

漢石例敘

元潘景梁、明王止仲、國朝黃太沖、並纂錄韓柳諸家文，爲碑碣例。世稱金石三例是也。夫刻石之興，肇自皇古。梁甫、弇山、載籍、蓋闕、琅邪、碣石、巡幸、偶經、降至東都、斯風乃熾。公卿貴人、下及一行之士、門生故吏、載筆貞珉、其書爵里、姓名爲傳體。其書生卒年月爲狀體。魏晉以降、迄於唐初、謹守其法。韓柳上法莊荀、工於思議、而體製浸失。余素喜東漢碑碣之文、甄而錄之、爲墓碑例百五十、廟碑例二十九、德政碑例十三、墓闕例十一、雜例三十二、總例四十八、爲文之體、略備於斯。魏晉以下、概從闕如。然而祖考稱考、

鄒據
史張

元祠
堂碑
祖母稱母。
金廣延
紀母碑

爾雅父之考爲王考、父之妣爲王母。漢人省文去王字、故曰考曰母。然不可爲例。又案歐陽氏博古圖、商父癸鼎持刀父癸尊、執戈父癸卣、持干父癸卣、執戈父癸盃、並上作孫字形、下注父癸二字。商父乙尊、父乙第二爵、並上作孫字、下注父乙二字。上孫字應指作器之人、下父癸父乙應指祖父。似孫得稱祖爲父。又商母乙鬲、亞形中孫執戟、旁注母乙二字。似孫得稱祖母爲母。案周卣提梁銘一字曰

孫圖說云。孫可以爲王父尸。然則古器凡篆作孫字如人立形。皆指尸。下文父癸父乙母乙。卽指上尸言。子稱父母。非孫稱祖父母也。又案薛氏鐘鼎款識。齊侯鐘云。用享于其皇祖。皇祖皇母。皇考。似祖母稱妣。蓋本毛詩似續妣祖。周禮以享先妣之義。然下有母考。則上文祖妣之妣。自是祖母之稱。若單用妣字。其義不明矣。

父母生稱考妣。

冀州從事

郭君碑

爾雅。父爲考。母爲妣。方言。南楚潏涇之間。謂婦妣曰母修。稱婦考曰父修。郭氏注爾雅云。禮記曰。生曰父母。妻死曰考妣。今世學者從之。案尙書曰。大傷厥考心。事厥考厥長。聰聽祖考之譟訓。如喪考妣。公羊傳曰。惠公者何。隱之考也。仲子者何。桓之母也。蒼頡篇曰。考妣延年。明此非死生之異稱矣。又注方言云。古者通以考妣爲生存之稱。據郭氏兩注。是考妣爲存歿通稱。曲禮孔疏云。此生死異稱。出爾雅文。言其別於生時耳。若通而言之。亦通也。下文引尙書云云。卽用郭氏爾雅注文。是孔氏亦以考妣爲存歿之通稱。案生死異稱。乃曲禮文。非爾雅文。孔氏誤也。說文。考。老也。妣。歿母也。考老互訓。乃本義。引伸爲歿父之稱。許不言者。妣爲歿母。則考爲歿父。從可知也。釋名。父死曰考。考。成也。亦言稿也。稿於義爲成。凡五材膠漆陶冶皮革。乾稿乃成也。母死曰妣。妣。比也。比之於父亦然也。據許劉二說。則考妣

定爲父母既歿之稱。今從之。

以及烈祖。太尉楊公碑。烈考。太尉橋公廟碑。文考。文範先生陳仲弓碑。之號。

此俱襲用詩書之文。然今人宜避。

親父。元儒先生裴壽碑。惠兄順弟。北軍中候郭仲奇碑。之名。或碑陰頌其舉主。三公山碑。或碑額題其姓名。蒼頡廟碑。

碑末碑陰。後人題年月姓名。常例也。碑額題名則非。

尊之則頌以聖心。冀州刺史王純碑。卑之則比于下流。太尉楊公碑。

聖心下流。並指出錢立碑人。

此皆不可爲法。若夫張氏爲天文之應。巴郡太守張敏碑。柳氏爲柳宿之精。孝廉柳敏碑。以霜月爲九月。以皇極爲五日。

魯相韓勳造孔廟禮器碑。

王氏懷祖漢隸拾遺。霜相古同聲。故霜字以相爲聲。錢氏大昕養新錄。霜月。相月也。爾雅。七月爲相。恐非漢人立文本意。

歐陽趙洪並多詆斥。又如祖考稱皇。淳于長夏承碑

曲禮祭王父曰皇祖考。王母曰皇祖妣。父曰皇考。母曰皇妣。夫曰皇辟。注更設稱號尊神異於人也。皇君也。祭法皇考廟。注亦云。皇君也。正義皇考廟者曾祖也。皇大也。君也曾祖轉尊。又加大君之稱也。案此則自曾祖至考及妻稱夫皆得爲皇。周制也。陔餘叢考曰。皇者大也。於君上之義無涉。曲禮父曰皇考。母曰皇妣。離騷朕皇考曰伯庸。晉司馬機爲燕王告祔廟文亦曰敢昭告於皇考清惠亭侯是也。徐氏讀禮通考謂今人以顯考爲父起於元世時以皇字爲君上尊稱遂易爲顯考。然葉石林云漢議宜帝父稱羣臣初請諡爲悼太子魏相以爲宜尊稱曰皇考。自是皇考遂爲尊號之稱。非後世所得通用。石林之言如此則似宋時已無稱父爲皇考之例。

女子稱妃。先生郭輔碑

碑云娥娥三妃行追太妣以三妃稱郭氏三女。案檀弓舜葬於蒼梧之野蓋三妃未之從也。碑文本此。鄭氏注云帝嚳而立四妃矣。象后妃四星其一明者爲正妃。餘三小者爲次妃。帝堯因焉。至舜不告而取不立正妃。但三妃而已。夏后氏增以三三而九合十二人。春秋說云天子取十二。卽夏制也。以虞夏及周制差之則般人又增以三九二十七合三十九人。周人上法帝嚳立正妃又三二十七爲八十一

人以增之。合百二十一一人。其位后也。夫人也。嬪也。世婦也。女御也。考爾雅釋詁。妃。合也。說文妃。匹也。妃。

同

對也。妃。嬪也。左氏桓二年傳。嘉耦曰妃。然則妃者上下皆得稱之。無貴賤一也。鄭君注檀弓。推周之制。天子妃一百二十一人。則后夫人嬪世婦女御皆得爲妃。明尊卑之稱。不繫此也。曲禮云。天子有后。有夫人。又云。天子之妃曰后。諸侯曰夫人。大夫曰孺人。士曰婦人。庶人曰妻。不言天子有妃。不言天子之妃曰妃者。知妃非后專稱也。諸侯大夫士庶人不稱妃者。承上文而辭省也。左傳。惠公元妃孟子。文十四年傳。子叔姬妃齊昭公。昭八年傳。陳哀公元妃生悼太子偃師。二妃生公子留。下妃生公子勝。後漢書皇后紀。晉獻升戎女爲元妃。則夫人稱妃。儀禮少牢饋食禮。諸侯卿大夫祭其祖禰於廟之禮也。成康而云以某妃配某氏。則孺人稱妃。左氏成八年傳。士之二三。猶喪妃耦。此士統庶人言。則婦人與妻稱妃也。秦漢以後。猶稱諸侯王妃。至大夫士不稱妃。蓋此稱鮮用而其義始尊矣。此今人所宜避也。又碑紀郭輔而稱其女爲妃。修辭未善。若夫以太姬比諸女。洪氏隸釋已斥其非。不更贅言。

郡署稱朝。

司隸從事郭亮碑。陳州從事尹宙碑。

顧氏亭林日知錄。據後漢書劉琨傳。三國志孫皓傳注。晉盧湛贈劉琨詩。謂郡守稱朝。據潘岳西征賦。謂縣令稱朝。又引胡三省通鑑注。晉宋之間。郡曰郡朝。府曰府朝。藩王曰藩朝。宋武帝爲

宋王、齊高帝爲齊王，時曰霸朝。然非後世所可通用。又案郭究尹宙二碑，皆稱本朝。此猶撰文人稱之，非太守自稱。後漢書法真傳：太守曰：欲以功曹相屈。光贊本朝。太守自稱本朝。後世斷不可行。

官牒稱勅

帝堯碑、史晨龔孔廟後碑、西嶽華山廟碑、仙人唐公房碑、武都太守李翁西狹頌。

勅本作敕。漢碑多作勅。其實勅音徠，不當借用。顧氏亭林金石文字記，據陳咸傳及孫寶何竝之文，又據韋賢、丙吉、趙廣漢、韓延壽、王尊、朱博、龔遂諸傳，謂漢時官長行之掾屬、祖父行之子孫，皆曰勅。又據何曾傳，謂晉時上下通稱。至南北朝，惟朝廷專之，而臣下不敢用。故北齊樂陵王百年、習書數勅字，遂以見殺。趙氏翼陔餘叢考，又據漢書成帝、元帝詔、王尊、丙吉傳、後漢書陳寵傳、魏略梁習、三國志高堂隆、司馬昭、張猛諸人證，長官勅僚屬。據漢書韋賢、後漢書張純、逸民傳、向子平、魏略曹操、李豐、吳書李衡、世語薛夏、北史雷紹、崔光諸人證，尊長勅子弟。又言北齊王百年作敕字，武成帝殺之，又似專爲君上之用。蓋古時詔敕，本自朝廷，而民間口語相沿，亦得通用。至唐顯慶中，再定制，必經鳳閣鸞臺，始名爲敕。而其令始嚴。然唐書安祿山討契丹，敕人持一繩，李憇嫡母卒，父晟敕憇服總，則臣下猶有用敕字者。此修書者習用古文之字，以爲文，非當日實事也。案漢代敕字，上下通用。魏晉以後，此字漸尊，今仍以漢言之。顧趙所引證外，後漢寇恂、岑彭、耿弇、劉隆、魯恭、郭丹、鮑永、梁統、曹褒、張霸、度尚、班超、橋

元、楊震、孔融、黃昌、范式諸傳所載，皆長官敕僚屬也。胡廣、周榮、楊由諸傳，崔駰傳注，引華嶠書所載，皆尊長敕卑幼於平日也。漢龔勝、後漢羊續、樊宏、鄒宏、龔統、張霸、丁鴻、趙咨、張酺、盧植、趙岐、任末、范曄、謝夷吾諸傳，列女傳袁安、李固傳注所載，皆尊長敕卑幼於臨終也。蓋遺命亦得稱敕，然在後世，俱不可行。又案薛氏鐘鼎款識，諸旅鬲云：諸旅作尊鬲，其子孫永寶用敕。此亦祖父敕子孫，在周時敕字通用。秦漢猶然，然不可爲後世法。

墓域稱陵

北海相景君碑，丹陽太守郭閔碑。

日知錄據史記趙世家、秦本紀爲稱陵之始。據水經注引風俗通，後漢書明章二帝紀、西京雜記及曹公祭橋元文、陳思王上書，謂人臣得稱陵。又據舊唐書德宗傳、盧綽駁武承訓造陵之奏，謂陵之稱施於尊極，不屬王公已下。此自南北朝以後然爾。審是則人臣不得稱陵，由來已久。案水經注，潞水篇云：潞水又東逕京邱北，南對漢中山頃王陵，北對君子岸，岸上有哀王子憲王陵。潞水又東逕白土北，南即靖王子康王陵。又東逕漢哀王陵，北冢有二墳，故世謂之兩女陵，非也。潞水篇云：潞水又東逕燕王陵，南此漢代人臣得稱陵也。潞水一云：又東逕秦相魏冢南，世謂之安平陵。此戰國時人臣得稱陵也。河水四云：其水東南逕子夏陵北，汾水篇云：襄陵縣西北有晉襄公陵。顏師古注漢書地理志，亦

以河東郡襄陵爲晉襄公之陵。陳留郡襄邑本承匡襄陵鄉也。宋襄公所葬。此春秋時諸侯及大夫士皆得稱陵。河水四引闕駟十三州志曰。雷首山南有古冢陵柏蔚然。俗謂之夷齊墓。似商周之際已通名陵。顧氏謂始於趙秦恐非。

以病亟爲不豫。

斥第
長碑

書金縢王有疾弗豫。孫氏星衍注曰。史遷弗作不豫一作愈。疏曰。曲禮疏引白虎通曰。天子病曰不豫。言不復豫政也。今本白虎通脫文。史公爲不豫者。書序。武王有疾。釋文云。馬本作有疾不豫。論衡死僞篇。後漢禮儀志。皆引作不豫。與史公同也。豫說文作愈。云喜也。引此經。釋文云。豫本又作惝。案惝非古字。豫愈文異義同。不豫者。言有疾不適意也。非不復豫政之謂。此既爲天子病之名。後人所宜避也。逸周書祭公解。王若曰。祖祭公。我聞祖不豫有加。此在人主稱臣下則可。且祭公於穆王在祖列。故陸稱爲祖。遂以天子病之名稱之。若人臣自稱則僭也。不豫與不憚同。顧命。王不憚。釋文。馬本作不釋。曰疾不解也。馬氏是別一義。律麻志引顧命曰。王有疾不豫。然則今文亦作不豫也。

以終命爲徂落。祝長嚴
斷碑

堯典。帝乃徂落。孟子引作放勳。乃徂落。說文作殂。云殂往死也。虞書曰。勛乃徂。爾雅。徂落。死也。據此諸

文則祖落乃死之通稱。祖殂通用。然書以紀帝堯。後人自不必作泛稱矣。

以遺言爲顧命。

陳太邱碑。司空臨晉侯楊公碑。朱公叔墳前石碑。處士國叔則銘。譙郡胡公夫人哀證。

臣以遺言告君。君以遺言告臣。古人皆稱顧命。禮記緇衣。葉公之顧命曰。毋以小謀敗大作。毋以嬖御人疾莊后。毋以嬖御士疾莊士大夫卿士。逸周書祭公解。祭公告穆王曰。謀父疾維不瘳。朕身尙在茲。朕魂在於天。又曰。汝無以嬖御固莊后云云。與緇衣大同小異。則知緇衣之葉公。乃祭公之訛。或葉公述祭公之言。記禮者文不備耳。此臣告其君也。書顧命篇。此君告其臣也。緇衣鄭注。臨死遺書曰顧命。顧命僞孔傳。臨終之命曰顧命。正義說文云。顧。還視也。鄭元云。回首曰顧。顧是將去之意。言臨將死去。回顧而爲語也。漢代人臣病亟。遺命戒其子孫。亦稱顧命。後漢書趙咨傳。咨遺書敕子允。允不忍父體與士并合。欲更改殯。祇建誓以顧命。於是奉行。崔駰傳。瑗臨終顧命子寔曰。歸精於天。還骨於地。何地不可藏形骸。勿歸鄉里是也。此則顧命二字。爲古人上下之通稱。然在今人亦宜避。

以居喪爲諒闇。

北海相景君銘並陰。

書無逸云。乃或亮陰。三年不言。伏生大傳作梁闇。禮記喪服四制作諒闇。論語作諒陰。公羊文九年注。引論語作涼闇。玉篇涼。俗涼字。漢書五行志作涼陰。伏生大傳書曰。高宗梁闇。三年不言。何爲梁闇也。傳曰。高

宗居凶廬三年不言。此之謂梁闇。鄭注：闇讀如鵲。鵲謂廬也。其注禮記及論語義同。左氏隱元年疏引馬氏注：亮，信也。陰，默也。爲聽於冢宰，信默而不言。僞孔傳論語孔注義同。案鄭氏是也。爾雅釋宮：楣謂之梁。喪服傳：居倚廬，寢苦枕塊。既虞，翦屏柱楣。注云：柱楣所謂梁闇。大傳：父母之喪，居倚廬不塗，寢苦枕塊，非喪事不言。君爲廬宮之既葬，柱楣塗廬，不於顯者。君大夫士皆宮之。既練居堂室，白虎通喪服篇：倚廬於中門外東牆下，戶北面。潘安仁西征賦：天子寢於諒闇。然則倚廬爲始遭喪時所居。柱楣爲既葬後所居也。梁本字亮，諒涼皆假借字。闇本字廣雅釋宮：庵，舍也。王氏懷祖疏證云：喪服四制：鄭注云：闇，謂廬也。義與庵同是也。作陰者，取陰闇之義，亦假借也。許君宗寅曰：文選潘安仁閒居賦：今天子諒闇之際，李善注：謂凶廬裏寒涼幽闇之處。故曰諒闇。其說與鄭氏異。要皆指凶廬言也。此制上下同之。故漢晉書通用諒闇二字。後漢書章帝八王傳：濟北惠王壽，諒闇以來二十八月。晉書山濤傳：濤遭母喪，詔曰：山太常尙居諒闇。然則諸王及人臣皆得稱諒闇也。景君銘稱諒闇，義蓋取此。然經傳既以稱高宗居喪，則亦後人所宜避也。碑又有單稱闇者。隸釋衛尉衡方碑：寢闇苦幽是也。既避諒闇，亦不必單用闇字。

爰以今儀，皆宜諱避。至於橋元碑陰，刊以鼎鉞之文。

太尉橋公廟碑

武氏石室，廣繪聖賢之象。

武梁祠
堂畫象

山陽麟鳳

麒麟鳳
皇碑

黽池木禾

李翁黽池
五瑞碑

並徵作繪之功。無關摛詞之義。凡斯之類。概不入編。於是刊其踳駁。

采厥精腴。繩墨定而曲直明。規榘陳而方圓正。洵藝林之表臬。而文苑之楷模也。爰爲條列。例目將以就正大雅。得所折衷焉。道光十年十一月。寶應劉寶楠敘於江都寓宅之愈愚齋。

漢石例目錄

卷一

墓碑例

稱碑例

稱碣例

稱銘例

稱表例

稱頌例

稱靈表例

稱哀讚例

稱神誥例

稱神道碑銘例

漢石例目錄

漢石例目錄

碑額書國號書官書姓稱君例

碑額書先世例

碑額書前官例

碑額標郡邑名例

碑額稱公例

碑額稱侯例

碑額稱府君例

碑額稱處士例

碑額稱先生例

碑額稱故民例

碑額標諡例

碑額標私諡稱先生而繫以字例

碑無額自標題其首行例

碑有額復自標題其首行例

碑文首用維兮例

碑文首用伊歎例

碑敍首以官爵冠姓氏上例

碑敍首書卒葬年月日及立碑人例

碑敍首書立碑年月日敍末書卒年月日及立碑人例

碑文稱公例

碑文稱君例

碑文稱府君例

碑文稱明府例

碑文稱使君例

碑文稱先生例

碑文稱徵士例

碑文稱處士例

碑文稱官例

碑文稱字例

碑文載私諡例

碑額書姓碑文不復書姓但書名字郡邑例

碑額書姓碑文復書姓例

墓在故里碑文但書名字不書郡邑例

卷二

墓碑例

碑文渾書先世高曾祖父不名例

先敘遠祖後敘近代俱不名例

先敘遠祖後敘近代遠祖名近代不名例

先敘近代後敘遠祖俱不名例

先敘近代後敘遠祖近代不名遠祖名例

先敘近代旁及伯叔兄弟子姓俱不名後敘遠祖名例

敘遠祖不敘近代遠祖名例

敘遠祖不敘近代遠祖不名例

詳敘先世功德書名例

詳敘先世功德不書名例

詳書先世功德旁及伯叔兄弟功德例

書天潢先世例

書國戚先世例

一人立二碑皆書名字邑里世系例

一人立二碑一敘名字近代及遠祖一敘名字近代不及遠祖例

一人立二碑皆書遠祖不書近代一載名字里一不載名字里例

一人立二碑皆書名字及遠祖近代一書近代名一不書近代名例

一人立二碑一敘先世一不敘先世例

一人立三碑兩碑敘名字先世一碑不敘名字先世例

一人立三碑一略敘先世不載名字一詳敘名字邑里及先世一僅載名字例

書墓例

漢石例目錄

書卒例

書不祿例

書終例

書不瘳例

書丁憂例

書告病例

書歷年及卒年月日例

書卒年月日及歷年閒以事蹟例

書歷年及卒葬年月日例

渾書歷年例

渾書卒年例

渾書卒例

書在官病卒例

書致仕病卒例

書歸葬例

書不歸葬例

書合葬例

書不合葬例

碑中兼敘妻德及卒年例

碑末附載妻卒年月日例

婦人墓碑書氏書字例

書繼室例

有官職者妻得統稱夫人例

敘婦人家世例

書子孫官爵例

書弟及子官爵事蹟例

書孤嗣例

書哀子例

碑石例目錄

書無子例

公卿大夫爲卑官處士立碑例

邑長爲邑人立碑例

父母爲子立碑例

僚友立碑例

姻戚立碑例

子立父碑例

子立母碑例

孫立祖碑例

女立父碑例

女立母碑例

弟立兄碑例

弟及子同立碑例

子吏門人同立碑例

門生爲師之祖父立碑例

門人爲師之子弟立碑例

父子同塋立碑例

兄弟同塋立碑例

婦祔姑墓例

孫祔祖墓例

碑敍首總敍立碑人例

碑中敍立碑人爵里姓名例

碑中渾敍立碑人碑陰詳載姓名例

碑中渾敍立碑人碑末夾注姓名例

碑中敍首立碑人碑陰敍同立碑人復書首立碑人例

碑陰載立碑人姓名同郡不書郡同縣不書縣例

碑陰人名後各總標郡縣名例

卷三

墓碑例

書故吏故民例

書門生門童弟子不同例

書處士與德行好學不同例

書清白士與聘士不同例

義士及弟子統名諸生服義例

書分子例

分書奔喪持服例

分書某代門生例

碑文自標撰文人姓名例

碑文首書撰文人姓名碑末書立碑人姓名又系以詩詩後又列同立碑人姓名例

碑文渾書撰文人碑陰詳列立碑人末作四言詩敘故吏持服行喪之事例

碑文中敘詔冊例

碑文中敘贈卹例

碑文中敘哀誄例

碑文但錄詔冊不復撰文例

碑末或陰附錄詔冊例

碑末補書先世例

碑末附載他人例

有誌無銘例

有銘無誌例

誌文接入銘詞不標詞曰銘曰等字例

自作誌銘例

生題石槨例

歿題石槨例

生壙碑末夾注年歲及其子名爵工師姓名例

墓碑中兼敘他石畫象及雕畫工人例

祔葬穿中石柱題詞例

石室題詞例

石人刊字例

石獸刊字例

記冢地例

冢地書向例

卷四

廟碑例

碑額稱廟例

碑額稱神祠例

碑額稱祠堂例

碑額載郡邑名字例

嶽廟石闕題詞例

神廟石闕題詞例

廟門題額例

廟門書先世官系及政蹟例

碑敍首書修廟年月日及修廟人爵里姓名字例

碑敍首書謁廟人爵里姓名字及年月日例

碑敍首書修廟祭廟人爵里姓名字碑中書同修廟人爵里姓名字碑末書助修廟人世系德業並繫以吉語例

碑文詳書修廟人立廟碑人爵里姓名字例

碑中書修廟人爵里姓不書名字碑末補書名字及子弟名字同修人名字例

碑中書立廟人爵姓名同立廟人爵里姓名碑末又詳載同立廟人爵里姓名字例

碑中書修廟立碑人爵里姓名字碑末書同修廟立碑人爵里姓名字例

碑中書立廟立碑人爵里姓名字碑末書立碑年月日碑陰又詳書立碑人及年月日例

碑中書立廟人碑末書祭廟人例

碑中書立壇刊碑人年月爵里姓名碑末書前致祭人爵里姓名字今監立碑致祭人年月爵里姓名及同監立碑人例

碑中書祀廟人姓名碑末又稱頌祀廟人碑陰載出錢立碑人姓名碑側又詳載立碑人例

碑中書制器人爵里姓碑末補書名字及出錢人爵里姓名字碑陰又廣載出錢人爵里姓名字例
前官修廟後官立碑詳書修廟立碑年月及前後官爵里姓例

前官立碑未成後官成之詳書前後立碑年月日及前後官爵里姓名字例

碑文全錄狀牒末用讚銘載立碑人爵里姓名字及立吏舍人例

碑文全錄狀牒末用讚銘載立碑人爵里姓名字及立碑年月日與工師姓名例

碑文敍子孫官爵及立廟立碑之由例

碑文末補書名字總書歷官及卒葬年月日例

碑陰詳列世次例

碑陰條列價直例

碑陰分書治黃屋作碑出錢人爵姓名字例

德政碑例

額稱循吏例

額兼二職例

稱功德敍例

稱功勳銘例

稱清德頌例

生稱諱例

生稱諱例

碑中書立碑年月立碑人爵里姓名字碑陰又詳載立碑人爵里姓名字及工師里姓名字例

碑中書立碑人姓名碑陰又詳列立碑姓名其碑中所書立碑人惟一人重書餘不重書碑陰末書年月日又繫以吉語例

碑中詳書先世名爵功烈碑末書年月日及立碑人姓名繫以吉語碑陰又詳載立碑人姓名例
碑中既詳載立碑人碑末書年月日又於立碑人中序其世系學業功德作詩稱美例

碑文全錄令牒例

碑末續書官階仕蹟附載詔書例

墓闕例

稱先靈例

稱神道例

書爵姓例

書爵省文例

詳書世系略載官績例

書卒葬年月日例

書立闕年月日及子弟建闕人石工人例

書弟姪官爵學行例

兩闕一書姓名里一書官爵例

兩闕分書官爵一書姓及立闕年月日一不書例

兩闕分書官爵一書姓名字一書姓例

卷五

雜例

表界域例

表鄉聚例

表宮殿例

表陂池例

爲宮殿立碑敍立碑人爵里姓名例

爲古墓立碑敍立碑人爵里姓名例

書修學校年月工程例

書修祠宇年月工程例

書修堤堰爵里姓名年月工程例

書修橋梁爵里姓名年月工程例

首書倡修堤堰人次及繼修人未復書倡修繼修同修及作銘人例

首書倡修橋梁人其同修者碑文三見末及義工義徒例

書修門闕爵里姓名年月工程例

書修道路爵里姓名年月工程例

書修道路爵里姓名及立碑人爵里姓名例

書修道路爵里姓名渾書立碑人不載爵里姓名例

碑首書表字末書記字例

漢石例目錄

碑首用維字末用主字例

書家產例

書宅舍例

表孝行例

表軍功例

舊有立石今始刊詞揭於碑陰例

舊碑已壞改刊新石仍用舊文例

舊碑已壞改刊新石不用舊文例

兩人共立一碑例

一碑載兩人碑詞例

一碑載兩事例

神位祚几刻石例

神位柅棬刻石例

墳壇石例

廟壇石例

卷六

總例

碑文隔圈例

碑文空字例

碑文出格例

碑文提行例

碑文空行例

碑文低行例

重字旁注二字例

重字旁注二點例

銘詞稱詞例

銘詞稱銘例

銘詞稱誄例

漢石例

目錄

銘詞稱歎例

銘詞稱頌例

銘詞稱讚例

銘詞稱敍例

銘用三言例

銘用六言例

銘用七言例

銘用長短句例

銘詞分章例

銘後書亂曰例

銘後書重曰例

銘後書敍曰例

國號上加大字例

國號上加皇字例

國號上加聖字例

國號上加神字例

書四時天名例

書太歲例

書倉龍例

書星次例

書月律例

書朔例

書閏例

書廿書卅書冊等字例

碑末書立碑年月朔日太歲例

碑末書立碑人爵里姓名及年月日例

碑末碑陰書立碑人姓字不書名例

碑末書撰文寫碑刻碑人姓名例

碑末書市石察書刻碑人姓名例

碑文左旋例

碑文橫書例

碑陰有額例

碑陰標目例

碑陰書立碑人錢數例

碑陰書立碑出錢人子弟統於父兄例

碑末既書出錢人姓名復於出錢人中稱美其好義樂輸者例

碑陰末稱美工師例

近見錢唐梁君玉繩誌銘廣例。吳江郭君廉金石例補。採集漢魏六朝碑文。其塗則廣。其例甚略。又嘉興馮君登府金石綜例。上採商周。下及唐宋。旁及海東諸國。其例較梁郭差備。而疏略仍多。且漢碑已有之例。而引六朝唐碑。如稱父爲君。已見樊安碑。而引唐顏氏家廟碑。銘詞分章。已見張公神碑。劉熊碑。而引唐木潤魏夫人祠碑。銘有銘不加銘。已見太尉楊公碑。陳留太守胡公碑。而引北魏司馬元興墓志。序三代書爵不書名。亦見楊公胡公碑。而引東魏司馬昇墓志。銘。

注。自

助於漢景
君闕銘

若斯之類殊失檢校。又以稱曾祖爲高祖爲曾父。稱高祖爲高門。稱曾祖爲曾門。稱他人父爲先父。及生稱考妣爲例。今人臨文未可襲用。夫金石之學藉以考證經史。梁郭無所詮釋。馮君亦未發明。均未善也。三書已刊行。閱者自能辨之。道光十六年三月下旬。寶楠自校一過。漫識於目錄後。時寓都中揚州新館之淮海堂。

漢石例卷一

墓碑例

清 寶應劉寶楠錄

稱碑例

漢故國三老袁君碑 集古錄

歐陽氏集古錄、趙氏金石錄、洪氏隸釋、隸續所載諸墓碑，惟此碑順帝時立。

歐趙洪三家並載碑文云：永建六年二月卒，是此碑順帝時立。袁君

名良，通志金石略三老袁貢碑，自注永建六年貢其良之誤，與水經渠水篇注作袁梁晉同通也。又案袁安祖父名良，見後漢書本傳，在此袁良前。

年代較先，舉以示例。餘不備錄。

按禮碑

制有二：一爲宮廟庠序中庭之碑，以石爲之；一爲下棺之碑，以木爲之。聘禮賓入門三揖，鄭注：入門將曲揖，既曲北面又揖，當碑揖。又賓自碑內聽命，又賓降自碑內祭義，君牽牲，既入廟門，麗於碑。鄭注：麗，繫也。謂牲入廟，繫著中庭碑也。雜記：宰夫北面於碑南，東上。公食大夫禮，入陳鼎於碑南。此諸侯廟內

之碑也。諸侯廟有碑。則天子廟亦有碑。聘禮陪鼎上當碑南。陳注宮必有碑。所以識日景引陰陽也。凡碑引物者。宮廟則麗牲焉。以取毛血。其材宮廟以石。窆用木。又醯醢百甕夾碑。疏碑近北東當洗。案聘禮卿館於大夫。大夫館於士。謂館於大夫士之廟。則此所云碑者。賓館之碑。卽大夫士廟之碑。公食大夫禮。庶羞陳於碑內。庭實陳於碑外。亦指賓館。士冠禮。至於廟門揖入。三揖至於階。士昏禮同。此大夫士廟之碑也。據鄭注云。宮必有碑。則天子諸侯燕寢亦當有碑。賈公彥云。雖無文。兩君相朝。燕在寢。豈不三揖乎。明亦當有碑矣。其說是也。又鄉飲酒禮。三揖至於階。注將進揖。當陳揖。當碑揖。諸侯燕禮賓揖當與此同。

射記。主人以賓三揖及階。則諸侯鄉庠庭中有碑也。賈公彥謂天子庠序有碑。此以意推之。亦當然也。

宮廟之碑。皆在中庭。而文心雕龍云。宗廟有碑。樹之兩楹。事正麗牲。案正當作止。未勒勳績。玉海亦謂碑樹

兩楹。按兩楹不得有碑。此說誤也。是皆指中庭之碑言也。檀弓。公室視豐碑。三家視桓楹。鄭注。豐碑斲大木。爲之形如石碑。於椁前後四角樹之。穿中於間爲鹿盧。下棺以綵繞。天子六綵。四碑。前後各重鹿盧也。四植謂之桓。諸侯四綵。二碑。碑如桓矣。大夫二綵。二碑。士二綵。無碑。按喪大記。君葬用輅。四綵。二碑。大夫葬用輅。二綵。二碑。士二綵。無碑。此鄭注所本。喪大記又云。凡封用綵。去碑負引。鄭注。樹碑於壙之前後。以綵繞碑間之鹿盧。輓棺而下之。此時棺下。窆使輓者皆繫綵而繞。要負引舒縱之。備失脫也。

用緋去碑者謂縱下之時也。劉熙釋名碑者被也。此本葬時所設也。

孫氏風衍北堂書鈔景宋本跋此書所引經典如引釋名碑者被也本葬時所設也今本

葬作王葬足證古本書傳與流傳本不同今依據改恭見曰廣韻碑字注引釋名云本葬時所設尤爲確證而顧氏金石文字記據誤本釋名駁難不知釋名古本固不誤也

施轆轤以繩被其上引以下棺也。

臣子追述君父之功美。

廣韻引無美字

以書其上。後人因焉。故建於道陌之頭。顯見之處。名其文就謂之碑也。

是皆指下棺之碑言也。潘氏昂霄金石例引韻會舉要碑字注云說文豎石紀功德從石卑聲徐曰案古宗廟之碑以繫牲耳後人因於其上紀功德此碑字從石秦以來制也七十二家封禪勒石不言碑穆天子傳乃爲名迹於弇茲石上亦不言碑案今本說文無紀功德三字不知韻會所據何本碑字從石見儀禮禮記不得云秦制但經傳所云碑在宮廟則以石下棺則以木此爲異耳其名碑則一也紀功德亦以石但不名碑故史記封禪書引管子秦始皇本紀並云刻石不言立碑淮南子盧敖見若士邂逅乎碑高誘注匿於碑陰此見於西漢人書也然則墓用石名碑與刻石紀功德名碑皆始於漢而文心雕龍謂碑者埤也上古帝王紀號封禪樹石埤岳故曰碑也周穆王紀述于弇山之石亦古碑之意此謂碑名肇自上古其說恐非隸續曰碑之有穿在廟則以繫牲在穴則以下棺又曰漢碑穿無不居中楊統碑後有餘石打碑者去之非穿之偏也金石文字記曰郎中鄭固碑有一大孔漢碑多如此

孫何碑解云、何始寓家於潁、嘗適潁、見荀陳古碑數四、皆穴其上、若貫索之爲者、問故起居郎張公觀、公曰、此無足異也、蓋漢去聖未遠、猶有古豐碑之象耳、後之碑則不然矣、予見漢碑、皆高不過今之三尺餘、可用以麗牲、以木爲之、可用以引棺、今既失其穿中之制、而碑之高下、乃無限度、與古人之碑、名同而體異也、

趙氏陔餘叢考曰、碑有序有銘、謂之碑文可也、而直謂之碑、則非也、孫何曰、蔡邕譔郭有道陳太邱碑、皆有序冠篇、而未亂之以銘、未嘗直名之曰碑、迨李勣爲高愍女碑、羅隱爲三叔碑、梅先生碑、則序與銘混、而不分其目、亦不復曰文而直曰碑、是竟以麗牲懸紳之具、而名其文矣、古者嘉量有銘、謂之量銘、鐘有銘、謂之鐘銘、鼎有銘、謂之鼎銘、不聞其去銘字、而直謂之量也、鐘也、鼎也、此名目之宜審者也、自注、南史虞荔傳、梁武於城西置士林館、荔乃制碑奏上帝、卽命勒于館、則六朝時已單名曰碑、案歐趙諸家所錄漢碑、其標目皆單稱碑、不稱碑文、又歐薛諸家所錄量鐘鼎、其標目亦單稱量稱鐘稱鼎、不稱量銘鐘銘鼎銘、趙氏所言殊非、

稱碣例

許君彖寅曰、周禮秋官職金、稱而璽之、注、今時之書、有所表識、謂之碣、藥、又蜡氏、有死於道路者、令埋而置碣、漢書酷吏傳、極寺門恒東、楊著其姓名、顏師古注、楊、杙也、櫟杙於葬處、而書死者姓名也、說文、碣、楊藥也、春秋傳曰、楊而書之、

廣雅、楊藥、杙也、廣韻、楊藥、有所表識也、楊藥、漢人語、其字本从木、後人以石爲之、因通用碣、案許說是也、碣用木者、亦古碑用木之證、

孔德讓碣集古錄

江原長進德碣隸釋

隸釋曰：江原長碣，似闕非闕，似碑非碑。隸續曰：孔謙碣甚小，一穿微偏，左有暈一重，起于穿中，復有兩暈在右，其一甚短，與它碑小異。金石例曰：五品以上立碑，螭首龜趺，七品以上立碣，圭首方趺。案此隋制，非漢制也。金石錄：隸釋並載故民吳公碑，童子逢盛碑，賤者幼者並稱碑，稱碑者非以其官尊，則稱碣者非以其官卑也。隸續碑圖：堂邑令費君碑，螭首。太尉陳公司空宗公碑，圭首。水經注：陰溝水篇載費亭侯曹騰碑，亦圭首。則

螭首圭首，在漢又無定制也。說文：碑，豎石也。碣，特立之石也。東海有碣石山，然則碑碣在漢爲通稱。隸釋：國三老袁良碑銘曰：才本惠曜其碣，是碑碣通稱之證。特碣較碑狹小而員，後漢書竇融傳：憲登燕然山刻石，令班固作銘曰：封神正

兮建隆碣。注：方者謂之碑，圓者謂之碣，碣碣也是也。趙岐傳：年三十餘有重疾，乃爲遺令，勅兄子曰：可立一員石於吾墓前，又劉昭祭祀志注：引應劭漢官馬第伯封禪儀記曰：治石二枚，狀博平圓九尺，此

壇上石也。其一石武帝時石也。此貞石皆碣也。昔人謂石鼓乃石碣。碣形似鼓。遂誤名鼓。蓋有見於此。隸續碑圖云：江原長碑，其下一

獸銜環，其文三行，以左爲首，似亦是墓闕也。案此圖上狹下廣，誠如隸釋所云，似闕非闕，此復云亦是墓闕，非也。又此圖碑首方平，無圭寧之文，豈漢制圭首縣首統名碑，首無圭寧名碣歟。

稱銘例

說文：名，自命也。从口夕，夕者冥也，冥不相見，故曰口自名。段氏玉裁注曰：祭統曰：銘者，自名也。此許所本。周禮小祝：故書作銘，今書或作名。十喪禮：古文作銘，今文皆爲名。許君於金部不錄銘字，從周官今書禮，今文也。許意凡經傳銘字，皆當作名。鄭君注經，乃釋銘爲刻，劉熙乃云：銘，名也。記名其功也。呂忱乃云：銘，題勒也。不用許說。

漢故中常侍長樂太僕吉成侯州君之銘

金石錄

漢揚州刺史敬君之銘

同上

碑稱銘，常例也。略舉趙氏書以見例。餘不備錄。按禮記大學有湯盤銘，祭統有孔悝鼎銘，大戴記踐阼有武王几杖銘，左氏傳有譏鼎銘，正考父鼎銘，銘謂題勒也。穆天子傳銘迹於縣圖之上。郭注謂勒石銘功德也。皆非施之於葬。古者葬用銘旌，不用銘石。士喪禮爲銘各以其物。亡則以緇長半幅。經末長終幅，廣三寸。書銘于末，曰某氏某之柩。檀弓銘明旌也。以死者爲不可別已，故以其旗識之。喪服小記：書銘自天子達

於士其辭一也。男子稱名，婦人書姓與伯仲，如不知姓則書氏。鄭注：此謂殷禮也。孔疏：書銘謂書亡人名字於旌旗也。天子書銘於大常，諸侯以下則各書於旌旗也。

司常、王建大常，諸侯建旂，孤卿建旛。

大夫士建物，師都建旗，州里建旛，縣鄙建旂，皆畫其象焉。官府各象其事，州里各象其名，家各象其號，事名號者，徽號所以題別衆臣，樹之於位，朝各就焉。士喪禮曰：爲銘各以其物，此蓋其制也。案此則生以表朝位謂之旌，歿以表柩謂之銘旌，葬則埋入壙中，旣夕云：祝取銘置于茵，賈疏：茵入壙，銘亦入壙是也。兩漢以來，旣埋銘旌，復埋銘石。

呂氏春秋安死篇：今有人於此，爲石銘置之椁上，曰：此其中之物，具珠玉玩好財物寶器甚多，不可不扣，扣之必大富。世世乘車食肉，人必相與笑之，以爲大惑。據

此文則銘石或豎立墓側，然此則寓實，非定例。

其稱述功績，則取法鐘鼎，其詳書名氏，則取法銘旌。祭統曰：銘者，自名也。自名以稱揚其先祖之美，而明著之後世者也。又曰：銘者，論譏其先祖之有德善功烈勳勞慶賞聲名，列於天下而酌之祭器，自成其名焉，以祀其先祖者也。法物銘其先績，墓石亦銘其先績，故銘墓亦稱銘，其制當始於秦漢，而傳記所載季札之喪，孔子銘墓，衛靈之葬，石槨有銘，以及比干誌刻之盤，滕公定葬之石，後人僞託，皆無取焉。

陔餘叢考曰、墓誌銘之始、王阮亭池北偶談、謂事祖廣記引炙輅子、以爲始于王戎、馮鑑事始、以爲始于西漢杜子春、而高承事物紀原、以爲始于比干、槎上老舌、又引孔子之喪、公西赤志之、子張之喪、公明儀志之、以爲墓志之始、不知檀弓所謂志之者、猶今之主喪云爾、未可改作誌也、惟封氏見聞錄、青州古冢有石刻銘云、青州世子東海女郎賈吳、以爲東海王越之女、嫁荀晞之子者、又東都殖業坊王戎墓、有銘曰、晉司徒尙書令安豐侯王君墓、銘凡數百字、又魏侍中繆襲、葬父母、墓下題版文、則誌銘之作、納於壙中者、起於魏晉無疑云云、阮亭所據封氏之說固核、然南史齊武帝裴皇后薨、時議欲立石誌、王儉曰、石誌不出禮經、起自宋元嘉中顏延之爲王球石誌、素族無銘策、故以紀行、自爾以來、共相祖襲、今儲妃之重、既有哀策、不煩石誌、此則墓誌起於元嘉中之明據也、司馬溫公亦謂南朝始有銘誌埋墓之事、然賈吳辨讖東海王越之女一事、亦見南史、則晉已有墓誌之例、又宋書何承天傳、文帝開元武湖、遇大冢、得一銅斗、帝以問羣臣、承天曰、此新莽時威斗、三公亡皆賜之葬、時三公居江左者、惟甄邯、此必邯墓也、俄而冢內更得一石、銘曰、大司徒甄邯之墓、又張華博物志、載西漢南宮殿內有醇儒王史威長葬銘曰、明明哲士、知存知亡、崇隴原野、非寧非康、不封不樹、作靈垂光、厥銘何依、王史威長、則西漢時已有墓銘也、金史蔡珪傳、金海陵王欲展都城、有兩燕王墓、舊在東城外、俗傳燕王及太子丹之葬也、及啓壙、其東墓之樞端、題曰燕靈王、舊卽古松字、漢高祖子劉建也、其西墓蓋燕

康王劉嘉之葬也。此又西漢題識於柩之法。不特此也。莊子云。衛靈公卜葬於沙邱。掘之得石槨。有銘曰。不憑其子。靈公乃奪而埋之。則春秋以前已有銘於墓中者矣。由此數事以觀。墓銘之來已久。王儉謂始自顏延之。此又何說。竊意古來銘墓。但書姓名官位。間或銘數語於其上。而謨文敘事。臚述生平。則起於顏延之耳。又曰。碑刻以孔子題延陵吳季子十字碑爲始。或疑爲後人僞託者。唐李陽冰初上嶧山篆。後見此碑。遂變化開合。如龍如虎。則非後人所能造也。案叢考謂謨文敘事。起於顏延之。則歐陽趙洪諸家所錄漢人墓銘。又何說也。

近閱孫氏風衍孔子題吳季子墓字考云。孔子題字。見於唐大曆十四年。蕭定刻石。稱開元中元宗敕殷仲容模搨之。本文云。於唐有吳延陵君子之墓。又見汝閣

緯帖。字蹟縮小。文亦不同。然皆在此刻之後。余考春秋時。孔子未嘗至吳。而至齊觀贏博之葬。細繹審字。當爲葬字。恐是孔子題季札墓文。後人摹而刻諸吳地者也。藝文類聚載宋范泰吳季子札贊云。贏博遠死。解劍在生。夫子展止。爰詔作名。是言孔子展止在贏博作名者。名字古不从金。此稱孔子題字之始。則晉宋人已盛傳之。碑文器字。汗簡引作鑿晉墓。云孔子題季子墓文。郭忠恕所見。亦是唐摹本。已與蕭定石刻不同。蓋碑文漫漶。傳摹者不能無舛耳。予案舉實當爲勝。从古文。死在井閒。下省一中。汗簡以勝爲石經死字。而葬作屬。知子即尸之誤。人即尸下人也。則孔子所題。應是觀葬贏博。時書此文以歎美之。其爲先聖手蹟。非妄傳也。案孫說近理。附錄俟考。

稱表例

漢故謁者景君墓表

金石錄

說文、裘、上衣也。从衣从毛。古者衣裘以毛爲表。表本裘表之名。其後衣之有表者皆名表。

喪大記。袍必有表。論語。當暑。袗

絺綌。必表而出之。

於是旌表亦名表。而墓石亦所以表揚功德。故亦名表。

釋名。下言於上曰表。思之於內。表思於外也。亦取表著之意。

後漢書李雲

傳、冀州刺史賈琮、過祠雲墓、刻石表之。延篤傳、爲平陽侯相、表襲遂之墓、立銘祭祠。范冉傳、刺史郡守各爲立碑表墓焉。此墓碑稱表之證。詳卷五碑首書表字注。

稱頌例

漢故成陽令唐君之頌

金石錄

此墓碑也。廟碑亦名頌。金石錄載漢桂陽太守周府君頌是也。不更見案頌本六詩之一。毛詩序云。頌者、美盛德之形容。以其成功。告於神明者也。鄭注周禮太師云。頌之言誦也。容也。誦今之德廣以美之。是則頌者、頌揚功德。被於樂章。非以刻石。史記秦始皇本紀。二十八年。始皇東行郡縣。上鄒嶧山立石。與魯諸儒生議刻石頌秦德。此作頌刻石之始。

下文之梁立石頌秦德。琅邪立石刻頌秦德。二十九年之梁刻石。三十二年刻碣石門。三十七年會稽立石刻頌秦德。皆仿於此。

兩

漢時、凡頌揚功德之文、皆得名頌。上下同之。若王褒聖主得賢臣頌、揚雄趙充國頌是也。

表揚處士。亦得稱頌。後漢書法

虞傳友人郭正曰法真可謂百世之師者矣乃共刊石頌之

表墓之文亦所以頌揚功德故亦得名頌後漢書桓榮傳彬卒於家諸儒過

共樹碑而頌焉崔駰傳初寔父卒起家塋立碑頌寔卒大鴻臚袁隗樹碑頌德姜肱傳熹平二年終于家弟子劉操刊石頌之韓韶傳以病卒官同郡李膺等爲立碑頌焉是也

稱靈表例

太傅胡公夫人靈表

蔡中郎集

司徒袁公夫人馬氏靈表

同上

靈之爲善常訓也

書盤庚爲孔傳詩定之方中鄭箋並云靈善也

大戴禮曾子篇神靈者品物之本也陽之精氣曰神陰之精氣曰

靈詩靈臺傳神之精明者稱靈

水經湘水注聖人之神曰靈

故漢書禮樂志安世房中歌靈凡再見郊祀歌練時日靈

凡八見天地一見赤蛟五見皆謂神靈也說文云靈靈巫以玉事神从玉詭聲又云靈或从巫案靈本事神之玉因以名神其事神之巫亦因以名靈

王逸注楚詞或云神或云巫隨文解之其注靈中君云楚人名巫爲靈子是巫名靈者楚語則然非正訓也

然則靈表者

以兆域爲神靈所依故表其神靈王稚子闕稱先靈是也

見墓闕例

稱哀讚例

議郎胡公夫人哀讚

蔡中郎集

說文有贊無讚。則讚乃贊之俗字也。說文曰：贊見也。徐鉉曰：進也。執贊而進，有司贊相之。案事神接賓，皆有贊幣者，釋辭，故導引之辭。經中損相贊辭是稱述之辭。史中贊辭是皆得名贊。釋名有讚無贊。釋言語篇云：讚，錄也。省錄之也。釋典藝篇云：稱人之美曰讚。讚，纂也。纂，集其美而敘之也。文心雕龍云：讚者，明也。昔虞舜之祀，樂正重讚，蓋唱發之辭也。及益讚於禹，伊陟讚於巫咸，並颺言以明事，嗟歎以助辭也。此並以讚爲贊正字，與許氏異。碑稱哀讚者，讀文皆代胡夫人之子述哀慟之辭故也。

稱神語例

漢交阯都尉胡夫人黃氏神語

蔡中郎集

周禮士師以五戒先後刑罰。二曰語，用之於會同。注：大誥康誥之屬，是誥乃上告下之辭。說文：誥，告也。上告下，下告上，並得爲語。書序：湯歸自夏，至于大坰，仲虺作誥，以臣告君，是其例也。胡夫人留葬洛陽，不歸耐夫墓，碑文極言不耐葬之義，因名其碑爲神語，義取告神，與尋常墓碑不同。

稱神道碑銘例

漢故太尉楊公神道碑銘

集古錄

神道，卽羨道也。鄭氏注：周禮家人云：隧，羨道也。賈疏：天子有隧，諸侯以下有羨道。隧道上有負土，羨道上無負土。若然，隧與羨別。而鄭云：隧，羨道者，對則異，散則通。案周制：天子之墓道名隧。左氏：僖二十五年，晉文公請隧，不許是也。

左氏隱元年傳：潁考叔曰：闕地及泉，隧而相見。鄭莊公曰：大隧之中，其樂也融融。莊姜曰：大隧之外，其樂也洩洩。此則故爲隧道，以實黃泉相見之言，非鄭莊敢用隧葬也。

秦制

天子之墓道名羨。史記秦始皇紀：或言工匠爲機藏皆知之，藏重卽泄。大事畢已藏，閉中羨，下外羨門，盡閉工匠藏者，無復出者。正義：羨謂冢中神道是也。漢沿秦制，後漢書禮儀志云：大鴻臚設九賓，隨立陵南羨門，道東北面是也。

下文羨道凡四見

然則羨道改名神道者，避天子也。後漢書光武十王傳云：中山簡王

焉薨，詔大爲修冢塋，開神道。李賢注：墓前開道，建石柱以爲標，謂之神道是也。其與天子異者，天子神道在墓中，王侯以下神道卽指墓前地耳。陔餘叢考曰：吳曾能改齋漫錄謂：墓路稱神道，自漢已然。而引襄陽耆舊傳：光武立蘇嶺祠，刻二石鹿夾神道。又楊震碑首題：太尉楊公神道碑銘爲證。張謨又引漢書高惠文功臣表云：戚國侯李信成，坐爲太常丞相，侵神道爲隸臣。

據高祖功臣年表：信成坐縱丞相侵神道，在元狩五年。案建元以來侯者年表，

樂安侯李蔡，元狩五年，以丞相侵盜孝景園神道墻地罪，自殺國除，則信成所坐，卽李蔡也。天子神道本名美，此云孝景園神道者，上得兼下，故通稱也。又霍光傳，光夫人侈大其塋制，起三幽闕，築神道，謂此二事又在神道蓋起於西漢也。

碑額書國號書官書姓稱君例

漢故長水校尉曹君之碑

水經注陰溝水篇下同

漢故幽州刺史朱君之碑

右碑額二錄之以見大凡，餘不詳載。其不書國號及故字者，豫州從事皇毓碑，不書國號者，故西戎令范君之墓，不書故字者，漢謁者曹君之碑，並見水經注夏水篇，漢代詔策章奏表記之文，敘人爵名者，並云故某官某人，存歿從同，歿稱故者，見馬援章彪陰識劉殷葬，龔楊震張皓謝弼周舉左雄盧

植等傳，生稱故者，見伏湛廉范張霸班彪第五倫龐參劉陶謝弼蔡邕孟嘗謝該等傳，而鄭元傳應劭曰，故太山太守應仲遠，則自稱用故字，蓋故某官猶言前某官，原非物故之故，然在今日，則生者諱言故矣。不書官者，漢故陳君

之碑，王氏祖金不專標冢後官而詳書前職者，漢故綏民校尉騎都尉桂陽曲紅灌陽長熊君之碑，金石錄

無漢故二字及不書官爵者，虞君之碑，水經注陰溝水篇孔君之墓，金石錄非例之正，故不錄。稱君之制，詳後碑文

稱君例，案碑額皆陰文，金石文字記，引王宏撰曰，武榮碑額漢故執金吾承武君之碑，十字作陽文凸起，他碑所無，附錄於此，不別爲例。

碑額書先世例

□本周末嗣饒氏襲以興勃海君元孫伯著之碑

隸釋

金石錄周末上無闕字及本字。今從隸釋。隸釋曰：襲以興者，謂襲周之後而興。此時墓刻始萌芽，標題未當律令。碑有太歲丁亥字，當是建武或章和年所刻。案碑文云：胄周別封氏，衛，咸同邑而爲性同焉。咸本衛孫氏邑見左傳，其後人因以爲姓。孫氏爲衛同姓大夫，系出於周故云。

碑額書前官例

漢故博陵太守孔府君碑

碑文云：博陵太守遷下邳相河東太守。隸釋：金石錄無漢字。

金石錄曰：孔君自博陵再遷河東，而碑額題博陵。莫曉其何謂。隸釋曰：此碑陰有故吏十三人，皆博陵人，蓋其函甘棠之惠，痛夏屋之傾，相與刊立碑表，故以本郡題其首。案此則故吏爲前官立碑，得書前官，此一例也。

漢故車騎將軍馮公之碑

碑文云：車騎將軍坐遜位拜將作大匠河南尹復拜廷尉坐正法作左校拜也。騎校尉復廷尉。隸釋。

隸釋曰：碑云：一要金紫，十二銀艾，綬終於廷尉，而以將軍題碑者，尊金紫也。案隸釋所載司隸校尉魯

峻碑。

碑文云：拜司隸校尉遭母憂，自乞拜議郎，服竟，還拜屯騎校尉。案古錄曰：峻最後爲屯騎校尉，而碑首題司隸校尉，莫曉其義。隸釋曰：漢人碑誌或以所重之官揭之。司隸權尊而秩高，非列校可比。猶馮翊捨廷尉而用車騎也。案隸續載司隸校尉楊

淮碑云：司隸校尉將作大匠河南尹淮終

高陽令楊君碑。

碑文云：遷高陽令，拜思善侯相。集古錄曰：楊君最後爲口善侯相，其中

河南尹而額題司隸校尉與魯峻碑同。

二千石侯國相與令長等思善者沙南小

隸續載司徒掾梁休碑。

碑文云：辟司徒府，拜新都令。隸續曰：梁君

並以官尊

顯題其額，此又一例也。

漢故領校巴郡太守樊府君碑。

碑文云：牧伯劉公，表授巴郡。後漢中以助義都尉養疾閭里，又行襄義校尉。同上

隸釋曰：表授巴郡。後漢中其額以領校巴郡太守稱之者，朝無成命也。後漢中者，亦嘗再表此郡也。助

義都尉，襄義都尉，史策未之見。劉焉到蜀，以張魯爲督義司馬，可見助義與義皆劉焉率爾創置。案此

則前官之出於朝命者題其額，此又一例也。

碑額標郡邑名例

漢故光祿勳東平無鹽劉府君之碑。

集古錄：蔡中郎集有太尉汝南李公碑，彭城姜伯淮碑，其標目皆以郡名，然其額無明文，故不錄。

隸釋曰：漢人銘墓以郡邑題其首者，所見惟此一碑。案廟壇碑額亦題郡邑，金石錄載故太丘長額

川口陳君壇。

隸釋所載壇碑，更闕川字。其言曰：「額之下闕二字。」本傳云：「額川許人，此額額下是川，又一字是許。」

隸釋載漢故行梁相事陽孔君之神祠是也。廟碑

壇碑，不更爲例。

碑額稱公例

漢故司空公之碑。

金石錄：案蔡中郎集標目，太尉橋公李公揚公太傅胡公司空揚公太守胡公，皆稱公。其碑額當亦稱公。然集中無明文。又司空房植袁逢二碑標目，皆書名。此必非碑額也。故悉不錄。

舉一以見例。不備錄其稱公之制。詳後碑文稱公例。府君處士先生並同。

碑額稱侯例

漢故荊州刺史度侯之碑。

金石錄：蔡中郎集荊州刺史度侯碑，碑額亦當稱侯。

秦漢人稱公卿曰君侯。史記絳侯世家：廷尉稱周亞夫。栢里子列傳：甘羅稱呂不韋。李斯傳：趙高稱李斯。皆曰君侯是也。

兩漢書稱君侯甚多，不備錄。馮衍傳注：載衍與陰就書，前書稱君侯，後書稱明府。案衍傳：就始封新陽侯，故稱君侯。其後帝貶黜外戚賓客，衍由此得罪，意者就亦自貶損，故衍書不復稱君侯。而以太守國相稱之。

然必封侯始稱侯。

漢書劉屈氂傳注：如淳曰：漢儀注：列侯爲丞相稱君侯。師古曰：楊惲傳：邱常謂惲爲君侯。是則通呼列侯之尊稱耳。非必在於丞相也。

猶三公始稱公也。漢末不能如

禮。又省文去君字。故單稱侯。此墓碑也。廟碑額亦得稱侯。金石錄：載張子房碑額：漢故張侯之碑是

也。後不更見。

碑額稱府君例

漢故光祿勳東平無鹽劉府君之碑

見前

漢故河南尹蘇府君碑

金石錄

碑額稱處士例

處士園叔則碑

蔡中郎集案此集中標目也。其碑額當同。隸釋載金恭墓闕云。處士金恭。闕上亦標處士。與碑額同。

朱學勤曰。園叔則。藝文類聚引作園。疑作圈。爲是。圈卽四皓圈公之後。姓氏書無園姓。

碑額稱先生例

郭先生之碑

隸釋

碑額稱故民例

漢故民吳公之碑

金石錄

隸釋曰：漢之仕者，沒有遺愛。其州縣之民，爲之采石鑱銘，則自稱曰故民。吳公匿跡輜輳，不荅聘召，作碑者體其謙晦之操，故以民稱之。所謂故民者，物故之民也。

碑額標諡例

漢故太尉車騎將軍特進遼鄉昭烈侯劉公之碑

隸釋

碑額標私諡稱先生而繫以字例

漢文範先生陳仲弓之碑

金石錄 蔡中郎集 貞節先生范史 雲碑 元文先生李子材碑 標題當同

私諡詳後碑文載私諡例。碑額有稱私諡稱先生，不繫以字者，元儒婁先生碑，有稱爵稱私諡，不稱先生，不繫以字者，漢故司隸校尉忠惠父魯君碑，並見集古錄，文有詳略，不別爲例。

碑無額自標題其首行例

中常侍樊安碑弟一行，漢故中常侍騎都尉樊君之碑

隸釋

碑有額復自標題其首行例

泰山郡尉孔宙碑弟一行，漢泰山郡尉孔君之銘

隸釋

隸釋曰、凡漢刊其首行卽入詞、無額者或題其前、如張納樊安之比亦甚少、已篆其上、復標其端、惟此

碑、張納碑見
德政碑例。

碑文首用維兮例

張賓公妻穿中二柱文、維兮本造此穿者、張賓公妻子偉伯云云、維兮張偉伯子長仲云云、隸釋

隸釋曰、維兮猶烏呼之類、案逸周書周祝解曰、維哉其時告汝、維兮猶維哉也、

縣三老楊信碑、惟兮和平大漢元年、同上

隸釋曰、惟兮歎息之辭、和平威宗之紀年、案維惟通用、

碑文首用伊歎例

祝長嚴訢碑、伊歎嚴君諱訢字少通云云、金石錄

盧氏見曾校刻金石錄作伊歎、自注、謝本作伊歎、非是、此當如詩噫嘻成王之例、案隸釋載此碑亦作

伊歎、謝本不誤、

碑敍首以官爵冠姓氏上例

楊賜碑。漢有國師司空文烈侯楊公云云。

蔡中郎集

武梁碑。故從事武掾云云。

金石錄。隸釋載此碑畝字上闕。字當是漢字。

苑鎮碑。漢故荊州從事苑君云云。

隸釋

丁魴碑。廣漢屬國故都尉丁君云云。

同上

楊淮碑。故司隸校尉楊君云云。

隸續

碑額既標官爵。序首復標官爵。與標題首行體異意同。德政碑亦有此例。且兼序其郡縣名於姓上者。

隸續武都太守耿勳碑是也。

碑文首云。漢武都太守有扶風茂陵耿君云云。

後不更見。

碑敍首書卒葬年月日及立碑人例

太傅胡公碑。維漢二十有一世。建寧五年春三月。既生魄。八日壬戌。太傅安樂鄉侯胡公薨。越若來。四月。

辛酉。葬我君文恭侯。於是掾太原王允。雁門畢整。

按畢當作卑。廣韻卑字注云。蔡邕胡太傅碑有太傅掾鴈門卑整是也。又後漢皇后紀下虞美人紀。熹平四年。議郎卑整上言李賢注。風俗通。

曰卑氏鄭大夫卑諶之後漢有卑
窮爲北中太守亦作卑整可證

屬扶風會宙、潁川嚴歷等、僉謂公之德也云云刊之於碑、用慰哀思。蔡中郎集

朱公叔墳前石碑、維漢二十一世、延熹六年粵四月丁巳、忠文公益州太守朱君名穆、字公叔、卒於京師、其五月丙申、葬于宛邑北萬歲亭之陽、舊兆域之南、其孤野云云、設茲方石、鎮表靈域。同上

右例碑敍首書卒葬年月日、其有但書卒年月日、不書葬者、謁者景君墓表。

表云、惟元初元年五月丁卯、故謁者任城景君卒、金石錄

太尉郭禱後碑。

碑云、惟光和二年夏五月甲寅、太尉中大夫故太尉郭公薨、同上

益州太守無名碑。

碑云、永壽元年三月十有九日、益州太守口君卒、隸釋

但書卒年月不書

日者、祝長嚴訢碑。

碑云、惟漢中興、卯金休烈、和平元年、歲治東宮、星闕角房、月建朱鳥、中呂之均、顛寢徂落、壽不寬宏、經設三命、君獲其央、年六十九、金石錄、隸釋曰、謂庚寅四月、案中呂謝本作中宮、誤

平輿令薛

君碑。碑云、惟延熹六年春二月、平輿令薛君卒、同上、案謝本作三月、誤

北海相景君銘。

銘云、惟漢安二年仲秋口口、故北海相任城景府君卒、隸釋、案闕處當是之月二字

堂邑令費鳳碑。

碑云、惟熹

平六年、歲格于大荒、无射之月、堂邑令費君寢疾卒、同上、案金石錄無歲格于大荒句、隸釋文全故錄之

文有詳略、不別爲例。

碑敍首書立碑年月日、敍末書卒年月日及立碑人例

敦煌長史武斑碑、建和元年大歲在丁亥二月辛巳朔廿三日癸卯、長史同

下云云、案此立碑年月日

以永嘉元年

□月□日遭疾不□。案此卒之年月日於是金鄉長河開高陽史恢等追惟昔日同歲郎署故□石銘碑以旌明德。

碑文稱公例

太尉橋公碑。公諱元云云。蔡中郎集。中郎集。有橋公廟碑。亦稱公。

太傅文恭侯胡公碑。公諱廣云云。同上。中郎集。胡公凡三碑。皆稱公。

司空宗公碑。公諱俱云云。金石錄。

故民吳仲山碑。吳公仲山云云。同上。

太尉太傅司空皆三公也。蔡中郎集更有太尉李咸楊秉楊賜諸碑。司空房楨碑。金石錄有太尉郭臾碑。隸釋有太尉劉寬楊震諸碑。皆稱公是也。漢碑於舉主稱府君。常例也。而廷尉仲定碑。稱南陽陰府君。又稱南郡胡公。下邳趙公。同是舉主。而陰君爲南陽太守。稱府君。胡公爲太尉。趙公爲

太傅稱公。公之稱不可苟如此。獨吳仲山以故民稱公爲例之變。案古人稱公有數義。天子三公稱公。周之周公召公。漢

之鄧公禹吳公漢是也。

日知錄所引甚多，不備錄。日知錄據李善兩都賦注，謂漢御史大夫亦稱公。史記趙世家，趙父謂錯上初即位，公爲政用事，侵削諸侯，人口譏多怨公者。後漢書皇后紀，獻帝謂鄧慮曰：鄧公天下寧有是邪？

時二人皆官御史大夫，是御史大夫稱公也。案此則兩漢書君父稱臣子爲公者，皆以其爵稱之，或謂君稱臣父稱子得爲公，非也。

王者之後稱公，周之宋公是也。唐公虞公亦此例。諸侯之臣

稱君曰公，詩魯公是也。

詩書三傳不備錄。

鄰國之臣稱鄰君曰公，詩譚公是也。

三傳不備錄。

諸侯相稱曰公，左傳鄭伯

稱許公。

隱十年。

是也。諸侯之臣稱公，左傳齊棠公楚葉公是也。失其名曰公，秦漢之際侯公。

史記秦紀。

樅公羽

紀

呂公。

高祖紀日知錄所引甚多，不備錄。

是也。尊其老曰公，戰國時馮公。

齊策馮煖章。

漢白公。

漢書溝洫志。

南公。

項籍傳。

嬴公。

睦安傳。

建公。

是也。

日知錄又引史記文帝謂馮唐、公奈何案辱我案方言，凡尊老周晉秦隴謂之公。

子稱父曰公，戰國策陳軫將之魏，其子陳應止其公之行。史記

留侯世家，吾惟豎子固不足遣，乃公自行耳。又史記太史公司馬遷稱其父談是也。孫稱祖曰公，呂氏

春秋孔子之弟子從遠方來，孔子問之曰：子之公不有恙乎？次及其父母兄弟妻子是也。又後漢書鄭

元傳，孔融告高密縣，爲元特立一鄉，曰鄭公鄉，以爲公者仁德之正號，不必三事大夫。日知錄謂此是

曲說，陔餘叢考亦以鄭公爲年老稱公，不取仁德之說。竊謂孔融云公者，仁德之正號，此說未爲不通。

顧氏趙氏必以孔融所言爲非，非也。然則有名德者亦得稱公，又一義也。仲山碑乃其子所立，碑稱仲

山少立名迹約身同已節度無雙同不貪仕進云云其稱公者蓋兼子稱父公仁德稱公二例

碑文稱君例

太尉陳球碑君諱球云云隸釋下並同陳球二碑碑首皆稱君其下始稱公歐趙書並有此碑隸釋較詳故錄之後倣此

車騎將軍馮緄碑君諱緄云云

光祿勳劉曜碑君諱曜云云

司隸校尉魯峻碑君諱峻云云

冀州刺史王純碑君諱純云云

山陽太守祝睦碑君諱睦云云

竹邑侯相張壽碑君諱壽云云

後漢志太尉公將軍比公光祿勳卿司隸校尉比二千石太守侯國相皆二千石刺史雖六百石其尊
在太守上此皆內外尊官而碑文皆稱君故各錄其一以見例其餘內外官自二千石以下至於佐貳
僚屬其碑文類皆稱君不可殫錄又案荊州刺史度尚博陵太守孔彪諸碑皆屬吏立碑文稱君司隸

校尉魯峻、高陽令楊著諸碑，皆門生立碑文稱君。

漢碑多門人隨吏所立，無不稱君，略舉數碑以見例。

又費汎袁良碑，孫爲祖立，樊安

碑，子爲父立，鄧固碑，弟爲兄立，碑文皆稱君。此足以證尊卑皆得稱君。今人惟施於朋友及宗戚同輩

日知錄曰：漢時曹掾皆稱其府主爲君，至蒼頭亦得稱其主人爲君。後漢書李善傳：君夫人善在此是也。女亦得稱其父爲君。漢書王章傳：我君素剛，先死者必我君是也。結亦得稱其舅爲君。爾雅：姑舅在則曰君舅。君姑，淮南子：君公知其盛也，遂而去之。列女傳：我無樊

也。結亦得稱其舅爲君。爾雅：姑舅在則曰君舅。君姑，淮南子：君公知其盛也，遂而去之。列女傳：我無樊

碑文稱府君例

衛尉衡方碑，府君諱方云云。集古錄

此歿稱府君也。河南尹蘇君碑，安平相孫根碑，梁相費汎碑並同。其生稱府君者，廟碑則宏農太守樊

毅華嶽碑。

古文苑作樊毅修西嶽廟記，入記類，自注一作碑。案作碑是，碑類有西嶽華山亭碑，亦稱樊府君，與此同。

濟陰太守孟郁修堯廟碑，魯相韓勅修孔廟後碑。

韓勅碑文，並稱君末稱府君。

德政碑，則桂陽太守周憬功勳銘，司隸校尉楊渙石門頌，巴郡太守張納功德銘。

敍文稱君，標題稱府

君皆生稱府君也。

廟碑例，德政碑例，不更見。

其墓闕稱府君者，益州太守楊宗墓道，趙相雍勸闕銘，趙傅逢君神道，益

州太守高頤墓闕。

闕凡二一
稱府君。

交趾都尉沈君墓闕。亦歿稱府君也。

墓闕例不更見
上各碑文不悉錄。

費汎乃其孫均立。餘

皆故吏門生所立。亦稱府君。則府君爲通稱。今人惟子孫稱其祖父已歿者爲府君。若以稱他人及生而稱之。斥爲非禮。非也。日知錄曰。府君者。漢時太守之稱。三國志。孫堅襲荊州刺史王叡。叡見堅驚曰。兵自求賞。孫府君何以在其中。孫策進軍豫章。華歆爲太守。葛巾迎策。策謂歆曰。府君年德名望。遠近所歸。案府君之稱。著於後漢書。寇恂傳。稱太守耿況。劉平傳。稱太守孫萌。朱暉傳。稱太守阮況。王襲傳。劉表稱太守王暢。臧洪傳。稱太守張超。酷吏傳。涼州人稱太守樊仲華。高獲傳。稱太守鮑昱。華陀傳。稱太守陳登。西南邛都夷傳。稱太守張翕。又傳。變傳。變爲漢陽太守黃衍說變。又周嘉費長房傳。吳祐傳注。引濟北先賢傳。稱太守並爲府君。不知顧氏何以不引。

碑文稱明府例

北海相景君銘。伏惟明府。受質自天。

隸釋

此歿稱明府也。生亦稱明府。集古錄。朔方太守碑陰。

碑陰云。延熹四年。詔書遷衛令。五年正月到官。奉見明府。案明府未知所指。據文當指衛令上官。

隸釋。魯相

韓勅造孔廟禮器碑。

碑云。韓明府名勅。字叔節。

桐柏淮源廟碑。

碑云。烈烈明府。好古之則。案明府指南陽太守。

是也。蓋明府在漢爲太守國相之

通稱。

國相秩與太守同。故其稱亦同。其屬國及丞亦得稱明府。隸釋蜀郡屬國辛通達丞李仲曾造橋碑。碑首橫刻稱。幸爲明府。李爲君。碑文稱幸爲明君。李爲明府。對文則別。散則通也。明君之稱。今所不用。明府則相沿不改也。前漢書韓

延壽何並龔遂。後漢書郅惲周章張皓王龔臧洪鍾皓史弼杜密劉寵彭脩劉翊許揚高獲李郃法真

諸傳。並稱太守爲明府。

鄭宏傳注。引謝承書。亦稱太守爲明府。

吳祐傳。稱國相爲明府。孫寶傳。爲京兆尹。張湛傳。爲左馮翊。張

霸傳。梁不疑爲河南尹。亦稱明府。三輔與郡守秩同。又郅惲傳。稱左隊大夫。邊並爲明府。注。王莽以潁

川爲左隊。郡守爲大夫。是亦太守稱明府。張湛傳注。郡守所居曰府。府者尊高之稱。是也。若以稱公卿。

則變文稱明公。董卓傳。孫堅稱衛尉張溫。呂布傳。布稱曹操。並爲明公。是也。

鄧禹傳。稱光武爲明公。時方仕於更始。爲大將軍。故云。

若

以稱令長。則變文稱明廷。張儉傳。稱外黃令爲明廷。注。明廷猶明府是也。

碑文稱使君例

涼州刺史魏元丕碑。於戲使君。旣膺藻德。

隸釋

小黃門譙敏碑。於穆使君。盛德炤明。

同上

使君本使者之稱。史記漢書爰盎傳。徙爲吳相。告歸。丞相申屠嘉稱盎爲使君。案盎前爲中郎將隴西

都尉嘗持節出使。故稱使君。漢書王詡傳稱繡衣御史。曩勝之爲使君。顏師古注爲使者。故謂之使君。使音所吏反。後漢書寇恂傳恂稱更始使者爲使君。李賢注君者尊之稱也是也。其後遂爲校尉刺史通稱。鄧禹傳爲護羌校尉。崔駰傳陳禪爲司隸校尉。並稱使君。第五倫傳爲兗州刺史。傳燮傳耿鄙爲刺史。蓋勳傳梁鵠左章並爲刺史。劉表傳爲荊州刺史。並稱使君是也。臺佟傳稱刺史爲明使君。猶明府明公也。又郭伋傳調并州牧。童兒來迎再稱使君。案百官志孝武帝初置刺史。成帝更爲牧。建武十八年復爲刺史。伋調并州牧。在建武十一年。時方省朔方刺史屬并州。是不置刺史。然牧卽刺史更名。故仍稱使君。又袁術傳闔象稱術爲明公。孫策稱術爲使君。同時異稱。案術時自領楊州刺史。故策稱使君。又爲左將軍假節封陽翟侯。故象稱明公。又西羌傳任尙爲中郎將。稱使君。馬援傳注引東觀記馬賓以郎持節號使君。亦使臣之義。神道碑亦稱使君。見墓闕例。

碑文稱先生例

陳太邱碑先生諱寔云云。蔡中郎集下同。中郎集載太邱廟碑亦稱先生。又載太邱第二墓碑碑首稱君以下稱先生。

郭有道林宗碑先生名泰云云。

貞節先生范史雲碑先生諱丹云云。

彭城姜伯淮碑先生諱肱云云。

中郎集復有翟先生碑元文先生李子材碑翟先生無名字李子材碑多書名不可爲法不錄

歐趙諸書婁壽郭輔諸碑並稱先生與太邱諸碑同不備錄碑稱先生者多縉紳耆舊所立然太邱第

二碑其子紀立則先生亦通稱也。

郭輔碑女明文立然縉紳撰文故不同

先生有二義周孔之制輩行同而先生者稱先生儀

禮有司徹先生之胄鄭注先生長兄弟賈疏文承長兄弟之下故知先生非老人教學者論語憲問篇

見其與先生並行也包注先生成人也皇疏先生者成人謂先己之生也非謂師也是也。

爾雅先生爲兄包鄭所本

國時則以先生稱其師孟子離婁篇樂正子曰先生何爲出此言也又曾子居武城左右曰待先生者

如此其忠且敬也是也或非師而年齒甚尊以師禮事之者亦稱先生孟子告子篇宋牼將之楚孟子

曰先生將何之是也。

戰國策所稱先生皆然

自是以後先生遂爲尊稱不以稱同輩。

漢人撰禮記所稱先生皆指師而語爲政篇有事弟子服其勞有酒食先生饌馬

注先生父兄也先從父丹徒君論語駢枝曰年幼者爲弟子年長者爲先生皆謂人子也饌具也有事幼者服其勞有酒食長者共具

之內則曰男女未冠笄者昧爽而朝問何食飲矣若已食則退若未食則佐長者視具長者即先生也具即饌也鄭注內則即訓爲饌

案丹徒君之言是也鄭注儀禮饌皆訓具

馬氏以後世先生爲尊稱遂誤解論語

秦漢時或單稱先單稱生陔餘叢考曰史記蘇秦被刺死齊王求其

賊誅之。燕人曰：甚矣齊之爲蘇生報讐也。注：生一作先。言先生也。叔孫通諸弟子以制禮皆賜爲郎。喜曰：叔孫生誠聖人也。弟子稱師曰生，亦謂先生也。漢書貢禹傳：禹請老。元帝報曰：朕以生有伯夷之廉，史魚之直，故親近生。今未得久聞生之奇論也。師古曰：生，謂先生也。時禹年八十餘，元帝敬之，稱生非輕之，乃尊之也。此單稱生也。史記鼂錯傳：學申商刑名於軹張恢先所。徐廣曰：先，卽先生。漢書梅福曰：叔孫先非不忠也。注：先，猶言先生也。又建元中，上招賢良公卿曰：鄧先好奇計。注：亦曰鄧先，猶云鄧先生也。此單稱先也。案史記越世家：楚王曰：生休矣。又朱公長男見莊生曰：故辭生去。漢書高帝紀：漢王謂酈食其曰：以魏地萬戶封生。師古曰：生，猶言先生。他皆類此。蒯通傳：韓信曰：生且休矣。稱通爲先生也。賈誼傳：屈原放逐，誼追傷之。其辭曰：于嗟默默，生之無故兮。師古曰：生，先生也。後漢書鄧禹傳：光武謂禹曰：生遠來，寧欲仕乎？亦先生也。又漢書儒林傳：漢興，言易自淄川田生。言書自濟南伏生。言詩於魯，則申培公。於齊，則轅固生。燕則韓太傅。言禮則魯高堂生。言春秋於齊，則胡毋生。於趙，則董仲舒。師古曰：培固者，其人名。公生者，其號也。他皆類此。案此則下文田生、項生、白生、張生、歐陽生、繆生、許生、唐生、褚生、黃生、徐生，皆尊大之稱。是以韓嬰亦稱韓生，董仲舒亦稱董生，而孟喜傳云：喜詐言師田生且死時，枕喜鄰。獨傳喜。梁丘賀曰：田生絕於施讎手中。時喜歸東海，安得此事？喜賀皆田生弟子，稱其師爲田生，是先生之省文也。又案薛氏款識：有虜生鼎，屈生敦，叔猗生敦。此又似子孫稱其先人，不但

弟子稱師也。

碑文稱徵士例

陳太邱碑。徵士陳君。

蔡中郎集

韓勅孔廟後碑陰。徵士河南成臯蘇漢明。此廟碑稱徵士。下不更見。隸續曰。漢人題名有稱徵試博士者。此稱徵士。蓋聘召而不行者。陔餘叢考曰。有學行之士。經詔書徵召而不仕者曰徵士。尊稱之則曰徵君。後漢書黃憲傳。天下號憲爲徵君。魏志王肅傳。魏初徵士燉煌周生烈。註經傳。頗行於世。又管寧傳。註引傅子曰。胡徵君怡怡無不愛也。胡徵君謂胡晦。案後漢書姜肱傳。盜聞而感悔。求見徵君。韓康傳。亭長以韓徵君當過。方發人牛修道橋。及見康柴車幅巾。以爲田叟也。使奪其牛。有頃使者至。奪牛翁乃徵君也。此叢考所遺。亦稱聘君。金石錄。尉氏令鄭君碑。聘君之孫是也。

碑文稱處士例

處士圉叔則碑。伊漢二十有一世處士。有圉典字叔則者。

蔡中郎集

隸續載嚴發殘碑云。處士嚴發云云。乃桓譚陳章所上表牒之辭。非撰文人所稱。與此異。儀禮鄉射禮云。主人就先生而謀賓介。鄭注。賓介處士賢者。賈疏。案玉藻云。大夫素帶。士練帶。居士錦帶。弟子縞。

帶鄭元以居士在士之下。弟子之上。解爲道藝處士。非朝廷之士。此處士亦名君子。卽鄉飲酒禮云。徵唯所欲以告於鄉先生。君子可也。鄭亦云。君子有大德行不仕者。以其未仕有德自處。故名處士。君子也。又鄉射禮大夫與則公士爲賓。注。公士在官之士。鄉賓主用處士。疏。處士卽君子者也。據鄭賈說。則處士乃有賢德而不仕者之稱。漢代近古。故史傳中不輕稱處士。史記魏公子列傳。趙有處士毛公。薛公。張釋之傳。王生者。處士也。循吏列傳。孫叔敖者。楚之處士也。漢書。蒯通傳。齊處士東郭先生。梁石君。後漢書。劉寬傳。每行縣止息亭傳。輒引學官祭酒及處士諸生。李賢注。處士有道藝而在家者。郎顗傳。上書曰。處士漢中李固。張霸傳。表用郡人處士顧奉。公孫松等。徐穉傳。尙書令陳蕃疏曰。伏見處士豫章徐穉。彭城姜肱。汝南袁閔。京兆韋著。潁川李曇。注。謝承書曰。曇與徐孺子等。海內列名五處士焉。楊震傳。亦曰。詔徵處士韋著。劉昭五行志注。引蔡邕伯夷叔齊碑。處士平陽蘇騰。字元成。種岳傳。李燮上書曰。伏見故處士種岱。蓋勳傳注。引續漢書曰。勳表用處士扶風孫瑞。桂陽魏傑。京兆杜楷。宏農楊儒。長陵第五雋。黃瓊傳。上疏曰。伏見處士巴郡黃錯。漢陽任棠。趙岐傳注。引三輔決錄志云。馬融過問趙處士所在。禰衡傳。孔融上疏曰。竊見處士平原禰衡。法真傳。田羽薦真曰。處士法真。此處士之僅見於漢史者也。王氏巖白田集。荅李梅隱書曰。來諭令親棺前題處士之柩。諸人云然。而尊意獨不可以其人爲市肆人也。發論如此。甚服古道。古者銘旌墓誌。有官者稱官。無官者不例稱處士。古之抱道而不

仕則稱處士。謂才德可出而終處也。求其人足稱此名者。必如戰國之魯仲連。秦漢之園綺黃角。東漢之嚴子陵。黃叔度。徐孺子。郭林宗。申屠蟠。漢末之管幼安。王彥方。晉之陶元亮。宋之謝皋羽。鄭所南。金仁山。許白雲。乃足當之。世道極衰。僭妄無等。販脂胃脯之徒。苟具一棺。無不處士。不知何者。爲處士之實而加此名也。案王氏之言是也。漢碑中如囷叔則嚴發二人。雖不足比於仲連諸人。然亦謹飭自修之士。可稱爲處士。其碑陰書出錢姓名稱處士者。魯相韓勅造孔廟禮器碑。有蘇漢明等三人。

案蘇漢明在孔

廟禮器碑稱處士。在孔廟後碑稱徵士。實一人。

仙人唐公房碑。有祝龜等六人。繁陽令楊君碑。有壬休申瑒等十二人。吉成侯州輔

碑。有趙訢等五人。

並見隸釋

韓勅孔廟後碑。有孔徵一人。帝堯殘碑。有陳國等四人。鄭季宣碑。有德源等十

人。並見隸續

此雖不見史傳。然特書以示異。或亦鄉黨自好之士。故尊之曰處士。若酸棗令劉熊碑。宋□許

宗等五十五人。元儒先生婁壽碑。夏仲高等二十九人。皆稱處士。

見隸釋

有才德者。不應如此之多。然則

濫稱處士。自漢末已然矣。

碑文稱官例

從事武梁碑。□故從事武掾掾諱梁字綏宗掾體德忠孝云云。隸釋金石錄故上無闕字體上無掾字節錄文不備

廟碑亦得稱官蔡中郎集郡掾史張元祠堂碑孫詡立是也不更見

碑文稱字例

袁滿來墓碑茂德休行曰袁滿來。蔡中郎集下同碑文不明言名字然漢末類皆一字名知滿來是字

童幼胡根碑於惟仲原應氣淑靈。碑文云根字仲原

童子逢盛碑嘉慈伯彌天授其姿。隸釋下同碑文云盛字伯彌

督郵斑碑昂昂子翁如圭如璋。碑文云斑字子翁

戚伯著碑伯著勃海君元孫。碑文稱伯著亦稱著文多不全其稱著者蓋脫伯字或省文

相府小史夏堪碑嗟叔德含淑勳。碑文云堪字叔德

案袁滿來年十五胡根年七歲逢盛年十二並見碑文督郵斑碑云司吾君少子尙書之小弟又曰□

□□實顏氏遇諸嗟哉吉士。與此爲疇。戚伯著碑云。二七府召。禮性仁知。又云。大歲丁亥。娉妻朱氏。旬期著橫。遇邪度。不蒙禱卜。奄遂寘歿。夏堪碑云。春華萌。遭寇霜。壽不究。魄蜚揚。此三人亦當是早夭者。六人之中。胡根年七歲最少。已有字。古者二十冠而字。漢代已不如古。今人習亂有字。有別字。其來久矣。漢人臨文。幼賤稱字。非幼賤者類稱君。蔡中郎元文先生李。子材碑云。元文先生名休。又云。休少以好學。游心典謨。又云。休盡剖判。剝散幽暗。碑首稱私諡。稱先生。前半敘事。獨用史傳體稱名。不得比於幼賤稱字。且一篇之中。尊之則稱先生。卑之則稱名。古今無此文例也。豈後人點竄。非其原本與。

碑文載私諡例

陳太邱碑。大將軍弔祠。錫以嘉諡。諡曰文範先生。蔡中郎集

范史雲碑。太尉張公兖州劉君。陳留太守淳于君。外黃令劉君。使諸儒參按典禮。作誄著諡。曰貞節先生。同上

李子材碑。時令戴君。臨喪命諡。又云。按典考諡。諡以元文。同上

魯峻碑。於是門生汝南干。缺沛國丁直。魏郡馬萌。勃海呂圖。任城吳盛。陳留誠屯。東郡夏侯宏等三百廿

人昭告神明。諡君曰忠惠父。錄釋

梁休碑。太守安平趙府君。嘉厥高雍。守節曰貞。博聞曰文。請諡休爲貞文子。錄釋

載私諡。必載作諡之人。此定例也。中郎集。朱公叔墳前石碑。忠文公益州太守朱君云云。不言作諡人。然中郎別有朱公叔諡議。載其門人陳季珪等議諡。故墓碑略而不言。隸釋。元儒先生婁壽碑云。國人乃相與論惠處諡。刊石作銘。雖不載議諡人。而渾舉國人以示公議。亦無害於例也。魯峻稱父。梁休稱子者。蔡中郎朱公叔諡議曰。古之以子配諡者。皆諸侯之臣。又曰。周有仲山甫。伯陽嘉父。宋有正考父。魯有尼父。父雖非爵號。天子諸侯咸用。優賢禮同。案梁休爲司徒掾。比於古諸侯之臣。是以稱子。魯峻以門生議諡。賢而尊之。是以稱父。隸釋曰。羣下私諡。非古也。末流之弊。更相標榜。三君八顧之目。紛然而奇禍作。案洪氏所言。自是正論。然作碑文者。據事直書。其得失亦自見也。後漢楊厚私諡文父。張霸私諡憲文。陳寔私諡文範。夏恭私諡宣明。子牙私諡文德。范冉私諡貞節。法真私諡元德。并載後漢書本傳。又朱頴私諡貞宣。子穆私諡文忠。見朱暉傳。蔡邕父棧。私諡貞定。見邕傳。荀靖私諡元行。見荀淑傳。作史者大書以明輿論之公。補國典之缺。不必以私諡概從刪削也。陔餘叢考曰。私諡非禮。故荀爽嘗著論正之。見後漢書爽本傳。又宋史。張載卒。門人欲諡爲明誠夫子。司馬光曰。禮記言古者生無爵。

死無諡。檀弓書禮所由失。謂士之有諡。自縣賁父始。曾子曰。賤不諡貴。幼不諡長。惟天子則稱天以諡之。諸侯相諡。猶爲非禮。況弟子而諡其師乎。孔子歿。哀公諡之。不聞弟子復爲之諡也。是溫公亦以私諡爲非禮。與爽同。江氏藩私諡非禮辨曰。漢張璠荀爽以私諡爲非古。然柳下諡惠。黔婁諡康。私諡始於春秋時。不可謂不古也。蓋周人卒哭而諱。左傳申繻曰。周人以諱事神。名終將諱之名者。死者之名也。故於將葬之時。爲諡以易其名。易其名者。以諡易死者之名而諱之也。諱之者。非特子孫不敢斥言。且欲使後人亦不敢斥言。若無爵無諡。則柳下黔婁之賢。乃百世之師。豈可使後人斥言其名哉。此私諡之所以不得不舉也。蓋有爵者行事著於朝廷。其諡賜之於上。無爵者行事見於閭里。其諡定之於下。展禽下大夫。黔婁庶人。皆不得請諡於朝。故門人曾子議私諡焉。曾子問。賤不諡貴。幼不諡長。爲諸侯相諡而發。非私諡也。張璠荀爽不達斯義。輒生駁難。以譏刺當世。謂爲非禮。若從張璠荀爽之言。則曾子爲不知禮矣。

碑額書姓碑文不復書姓但書名字郡邑例

太尉橋公碑。公諱元。字公祖。梁國睢陽人也。

蔡中郎集

陳太邱碑。先生諱寔。字仲弓。潁川許昌人也。

同上

此定例不備錄。間有不書國名郡名而邑名無與同者。如司隸從事郭究碑。

碑云。君諱究。字長全。汲人也。

於例亦無失。

也。其或但書名字不書郡邑者。集古錄。太尉陳球。竹邑侯相張壽。金石錄。丹陽太守郭閔。安平相孫根。諸碑是也。或名字郡邑俱不書者。蔡中郎集。司空房楨。司空袁逢。荊州刺史庾侯。翟先生諸碑是也。

金石

錄。平與合薛君碑。隸釋。鄧令景君闕銘。亦無名字郡邑。

其有但載姓邑無名字者。隸釋。謁者景君墓表。

碑云。任城景君卒。

北海相景君銘。

碑云。任城景府君卒。

但載姓字無邑名人名者。隸釋。故民吳仲山碑。

碑云。吳公仲山。

是也。夫名字郡邑。不見於碑。其說有二。或其人

德業文章。表著天壤。不待攷碑而知者。或一人立數碑。已見他碑。不妨從略者。然非例之正也。至於人。不甚著。而乃靳此名字郡邑十餘字。使其後世泯滅無聞。撰文者獨何心哉。碑文先書諱。次書字。次書郡邑。常例也。古文苑。載張平子碑云。河間相張君。南陽西鄂人。諱衡。字平子。與常例異。不錄。

碑額書姓碑文復書姓例

河間相張平子碑。河間相張君云云。

見前注下同

故民吳公碑。吳公仲山云云。

漢碑無額者碑文書姓。隸續嚴訢碑無額其文云伊歆嚴君諱訢是也。碑有額而復書姓者所見惟此二碑。例之變也。然自唐宋以來相沿已久。文之工拙本不係此。故錄之。吳公碑乃其子立尊之故字而不名。以樊安碑書名較之。此爲變例。又案改姓者碑額雖書所改之姓。碑文必敍其本姓及改姓之由。與史傳體同。不得執碑額書姓碑文不復書姓之說。水經注。阪水篇。虞縣故城東有漢司徒盛允墓碑。允字伯世。梁國虞人也。其先諱氏。至漢中葉。避孝元皇帝諱。改姓曰盛。酈氏所云。似是碑文。然無明文。不能立例。附錄於此。

墓在故里碑文但書名字不書郡邑例

梁相費君碑。梁相諱汎。字仲慮。此邦之人也。金石錄

此省文法。然於例無失。廟碑亦有此例。隸釋。楚相孫叔敖碑云。楚相孫君諱饒。字叔敖。本是縣人也是也。下不更見水經注。清水篇。獲嘉縣故城西有漢桂陽太守趙越墓。冢北有碑。越字彥善。縣人也。案縣人二字。當卽碑文。今無文以證之。附錄俟攷。

漢石例卷二

墓碑例

碑文渾書先世高曾祖父不名例

童子逢盛碑。薄令之元孫。遂成君之曾孫。安平君之孫。五官掾之長子也。

金石錄 潯州從事尹宙碑。東平相之元。曾稽太守之曾省孫字。不可爲法。

此渾書四世也。其有渾書三世者。太尉橋公碑。

碑云。大鴻臚之曾孫。廣川相之孫。東萊太守之元子也。

蔡中郎集。元儒先生婁壽碑。

碑云。曾祖父攸。春秋以大

夫侍講至五官中郎將。祖父太常博士。徵朱

爵司馬。祖父安貧守賤。不可榮以祿。

隸釋 渾書二世者。司空文烈侯楊公碑。

碑云。公惟司徒之孫。太尉公之嫡子。

太守胡公碑。

碑云。交趾都尉

之孫。太傅安

樂侯之子也。汝南周巨勝碑。

碑云。陳留太守之孫。光祿勳之子也。

袁滿來碑。

碑云。太尉公之孫。司徒公之子。並見蔡中郎集。隸釋。潯州刺史朱龜碑。隸續。郎中王政碑同。

渾書二世。一

爲遠祖。一爲近代者。孔德讓碣。

碑云。宣尼公二十世孫。都尉君之子也。

集古錄 博陵太守孔彪碑。

碑云。孔子十九世之孫。顯川君之元子也。

隸釋 渾書二世

及世父叔父者。議郎元賓碑。

碑云。魯相之孫成德。下缺。東安平令北海相。下缺。守之弟子。中亦令兄子也。

隸釋 渾書二世及兄弟者。淳于長夏承碑。

碑云、東萊府君之孫、太尉掾之
中子、右中郎將弟也。金石錄 渾書一世者、太傅文恭侯胡公碑。碑云、交趾都尉之元子也。蔡中郎集。 金城太守殷君碑。碑云、大匠君之子也。

古 太尉陳球碑。碑云、廣漢太守之元子也。集古錄。隸釋、郎中鄉固、孝廉柳敏、車騎將軍馮緄、沛相楊統諸碑同。 渾書一世但書遠祖者、泰山都尉孔宙碑。碑云、孔

十九世之孫也。集古錄 渾書一世及兄弟者、費鳳別碑。碑云、梁相之元子。九江太守之長兄也。 督郵斑碑。碑云、司馬君少子、尚書之小弟。並見隸釋。 然古人臨文不

諱、豈以不稱其先世名爲敬哉、使其先世無所表見、而子孫金石之文、又不載其名字、豈孝子慈孫顯

揚褒大之意哉、撰文者權其先世顯晦、或名或不名可也。金石錄曰、漢時碑碣載其家世、皆止書官爵、蓋爲子孫作銘、不欲名其祖父、最爲得體、然非當代顯人、遂莫知其爲

何人也。容齋三筆、碑誌之作、本孝子慈孫、欲以稱揚其父祖之功德、播之當時、而垂之後世、當直存其名字、無所避隱、然東漢諸銘、載其先代、多只書官、如淳于長夏承碑云、東萊府君之孫、太尉掾之中子、右中郎將之弟、李翊碑云、特刺太守曾孫、謁者孫從事君元

子之類是也。

先敘遠祖後敘近代俱不名例

漢太尉楊公碑、姬姓之國有楊侯者、公其後也、其在漢室、赤泉侯佐高、丞相翼宣、咸以盛德、光于前朝、祖

司徒、考太尉、繼跡宰司、咸有助烈。蔡中郎集

先敘遠祖後敘近代遠祖名近代不名例

太尉楊公碑。其先蓋周武王之穆。晉唐叔之后也。末葉以支子食邑于楊。因氏焉。周室既微。裔胄無緒。暨漢興。烈祖楊喜。佐命征伐。封赤泉侯。嗣子業。絳冕相繼。公之丕考。以忠蹇亮弼輔。孝安登司徒。太尉。

蔡中郎集

同 下

太尉汝南李公碑。蓋秦將李信之後。孝武大將軍廣之胄也。枝流葉布。家于茲土。文武繼踵。世爲著姓。曾祖父江夏太守。伯父東郡太守。

此近代兼及伯父不別爲例

彭城姜伯淮碑。其先出自帝胄。在皇唐蓋與四岳共業。能禮於神。舜命秩宗。爰封于呂。其裔呂望。佐周克殷。俾侯齊國。姓有姜氏。卽其後也。高祖祖父。皆豫章太守。潁陰令。

右例竹邑侯相張壽司隸校尉魯峻等碑略同。

並見隸釋

又有同是近代高祖名祖父不名者。太尉橋公廟

碑。

碑云。橋氏之先。出自黃帝。帝葬于橋山。子孫之紹基立姓者。咸以爲氏。漢興世以禮樂爲業。高祖諱仁。位至大鴻臚。列名於儒林。祖侍中廣川相考東萊太守。蔡中郎集

高祖及父皆不名。高祖稱官父

稱字者。戚伯著碑。

碑云。勃海君元孫。李景長子也。隸釋

又有遠祖字近代名者。元文先生李子材碑。

碑云。其先李伯陽。周柱下史。觀衰世而通焉。其後雄俊豪

傑，往往岫出，自戰國及漢，名臣繼踵，支胄散逸，其遺子宛尙矣。王莽竊位，漢祚中移，考匡佐世祖，匡復郊廟，錫封茅土，卿相牧守，于時相逐。

蔡中郎集

不書遠祖近代，但書祖字而不名者，司隸

校尉楊淮碑。

碑云，大司隸孟文之元孫也。隸釋

書遠祖不書近代，但書兄，遠祖名兄不名者，金鄉長侯成碑。

碑云，其先出自幽岐周文之後，封于

鄭，鄭共仲賜諡曰侯，厥肩宜多，曰功佐國，要盟齊魯，嘉曾自郝，因目爲家焉，漢之興也，侯公納策，濟大上皇於鴻溝之阨，諡曰安國君，曾侯隨封明統侯，光武中興，元孫霸爲臨淮太守，擁兵從光武平定天下，轉拜執法右刺姦五威司命大司徒公，封於陵侯，校葉繁茂，或家河洧，或邑山濟，君則上黨太守之弟，同上。世有遠近，名有顯晦，故或書或不書，附錄於此，不別爲例。

先敘近代後敘遠祖俱不名例

陳留太守胡公碑，交阯都尉之孫，太傅安樂鄉侯少子也，其先與楚同姓，別封于胡，以國爲氏，臻乎漢奕

世載德，不替舊勳。

蔡中郎集

北軍中候郭仲奇碑，元城君之第四子，其先蓋周之冑緒，虞郭建國，享土受胙，政衰道失，晉克其邦，遭羸

項之際，高祖初起，運天苻命，序秦摘楚，遂定漢基，枝葉雲布，列於國郡。

隸釋

隸釋，郎中馬江碑，廣漢屬國侯李翊碑，略同。

先敘近代後敘遠祖近代不名遠祖名例

鴻臚陳君碑。君太丘君之元子也。始祖有虞。受禪陶唐。亦以命禹。其後嬀滿。當周武王時。祚土于陳。君其

世也。古文苑。

太尉陳球後碑。君廣漢太守之元子也。蓋周存六代。嬀滿繼虞。建國于陳。遷完祖齊。實爲陳氏。公下父自營州來宅海淮。世耽典籍。兼通勤誨。振裘褐。卽徵聘。荅宰司。荷顯貢者。繼世而傳焉。隸釋

先敘近代旁及伯叔兄弟子姓俱不名後敘遠祖名例

安平相孫根碑。司空公之伯子。樂安太守之兄子。漢陽太守侍御史之兄。乘氏令之考。厥先出自有殷。元商之系。子湯之苗。聖武定周。封比干之墓。屠裔分析。避地匿軌。姓曰孫焉。金石錄

金石錄曰。姓苑姓纂皆云。孫氏衛武公子爾。爲衛上卿。因氏焉。此碑云。比干之後。蓋古人或因賜姓。命氏。或以官。或以封。或以居。或以王父字爲氏。故姓氏雖同。而源流或異。碑文有先敘近代。旁及兄弟。不及伯叔子姓。俱不名。後敘遠祖名者。小黃門譙敏碑。碑云。鄴君之中子。章君之弟。郎中君之昆也。其先故國師。譙

後不系其美。發釋。

又有先世書字。兄弟書名者。斥彰長碑。碑云。祖字興先。爲執金吾。弟鳳。漁陽太守。金石錄。附錄於此。不別爲例。

敘遠祖不敘近代遠祖名例

文範先生陳仲弓碑其先出自有虞氏中葉當周之盛德有媯滿者武王配以太姬而封諸太昊之墟是爲陳胡公春秋之末失其爵土遂以國氏焉世督懿德令聞丕顯蔡中郎集下同

貞節先生范史雲碑先生陶唐氏之後也其在周室有士會者爲晉大夫以受范邑遂以爲氏漢文景之際爰自南陽來家于成安生惠延熹二年官至司徒廷尉君則其後也

瑯琊王傅蔡公碑蓋倉頡之精胤姬稷之末胄也昔叔度文王之昭建侯于蔡以國氏焉迄于平襄周祚微缺王室遂卑齊晉交爭強楚侵陵昭侯徙于州來公族分遷氏家于圉奕葉載德常歷官尹以逮于茲

太尉楊震碑金石錄

山陽太守祝睦碑荆州刺史度尙碑

隸釋

略同廟碑亦有用此例者郡掾史張元祠堂

碑蔡中郎集

是也金石錄又載巴郡太守樊敏碑敘周太王文王武王皆書名妄甚不可爲法

敘遠祖不敘近代遠祖不名例

先生郭輔碑其先出自有周王季之中子爲文王卿士食采隸釋作於虢至於武王錫而封之後世謂之

郭春秋之時爲晉所并歷隸釋作戰國秦漢子孫派分隸釋作來居荆士氏國立姓焉集古錄

詳敘先世功德書名例

國三老袁良碑。厥先鑒苗世爲封君。周之興。虞闕父典陶正。嗣滿爲陳侯。至元孫濤塗。初氏父字。立姓曰袁。魯僖公四年爲大夫。哀十一年頗作司徒。其末或適齊楚。而袁生口獨留陳。當秦之亂。隱居河洛。高祖破項。實從其冊。天下既定。還宅扶輿。孝武征和三年。生曾孫幹。斬賊公先勇。拜黃門郎。封關內侯。食遺鄉六百戶。後錫金紫。僊脩城之勳。幹薨。子經嗣。經薨。子山嗣。傳國三世。至王莽而絕。君卽山之曾孫。隸釋

隸釋。綏民校尉熊君碑。略同。按敘述先世。稱美不稱惡。此定例也。校官碑敘其先世。獨及弑君之潘崇。此固古人直筆。然華耦無故揚其先人華督之惡。左氏譏之。則校官碑固不可爲訓。

詳敘先世功德不書名例

豪長蔡滿頌。其先闕周封叔。

闕案叔下當是慶字。似宜入遠祖書名例。然下文詳敘先世功德。不書名。因別爲此例。

葉文王采食蔡闕。剿其氏。廉世卿尹。有功

王室。迄於大漢。繼踐繁隆。內任台翼。外作股肱。元初之闕隸釋擾攘君考銜詔。東掃其難。宰化闕苻守吳郡。再莅闕復牧青州。風聲所加。隸釋布愛樹之美。

隸釋。巴郡太守張納。敦煌長史武斑。梁相費汎。浚儀令衡立諸碑略同。

詳書先世功德旁及伯叔兄弟功德例

漢成湯令唐扶頤其先出自慶都感赤龍生堯王有天下大號爲唐治致雍熹尊天重民禪位虞□光受茅土通天三統苗胄枝分相土眠居因氏唐焉累世含祚受天之祐膺嗣彌光爲漢台輔君父孝廉郎中早卒季父蜀郡從弟會稽會稽從弟南陽右從兄東萊太守南陽弟司空公在朝遂隨正色竭忠爲國討曩六侯俱封受土襲爵金縢十三

隸釋

北軍中候郭仲奇碑其先蓋周之胄緒虞郭建國享土受胙政衰道失晉克其邦遭難項之際高祖初起運天苻命庠秦擣楚遂定漢基枝葉雲布列於國郡或潁川馮翊公卿校尉將相州郡令問休貴自東郡衛國家於河內汲

隸釋於誤乎汲誤彼據集古錄改正

亦世載德以鑒于君君惠兄竹邑侯相次尙書侍郎次濟北相順弟臨

沂長次徐州刺史次中山相次雒陽令咸以孝廉公府茂選貞亮皦白翼翼瑛彥配周之八爲國楨幹

同上

平都相將君碑

旁及從父文多闕

書天潢先世例

酸棗令劉熊碑厥祖天皇帝垂精接感篤生聖明□仍其則子孫亨之分源而流枝葉扶疏出王別胤

受爵列士，封侯載德，相繼丕顯。光武皇帝之元，廣陵王之孫，俞鄉侯之季子也。

釋 錄

隸釋：太尉劉寬、光祿勳劉曜碑，略同。

書國戚先世例

中常侍樊安碑：厥祖曰仲山父，翼佐周宣，出納王命，爲之喉舌，目致中興，食采于樊，子孫氏焉。亦世載德，守業不愆。在漢中葉，篤生哲媛，作合南頓，實產世祖，征討叛逆，復漢郊廟，而樊氏以帝元舅，顯受茅土，封寵五國，壽張侯目公德加位特進。其次竝以高聲處鄉校，侍中尙書據州典郡，不可勝載，爲天下著姓。

古文苑

一人立二碑皆書名字邑里世系例

太尉劉寬碑：公諱寬，字文饒，宏農華陰人也。其先□□聖漢王侯繼次，有國有號，列存家序。公之考乃作司徒，輔毘安順，勳載二葉。

故吏李諱等立

劉寬後碑：□□□□文饒，宏農華陰人也。厥祖出自□□□臣王侯相

繼，遭漢中微，失其爵士，世祖復阼，仍有顯位。光輔王室，公之考作司徒於安□□□勳績昭乎前朝。

門生殷也

等立。
隸釋。

一人立二碑一敍名字近代及遠祖一敍名字近代不及遠祖例

陳留太守胡公碑。君諱頌。字季叡。交阯都尉之孫。太傅安樂鄉侯少子也。其先與楚同姓。別封於胡。以國爲氏。臻乎漢。奕世載德。不替舊勳。鎗紳及門人立太守胡公碑。君諱頌。字季叡。交阯都尉之孫。太傅安樂侯之子

也。
主簿高吉等立
蔡中郎集

左氏襄三十一年傳。立胡女敬歸之子子野。杜預注。胡歸姓之國。又春秋昭十一年五月。夫人歸氏薨。杜注。胡女歸姓。九月葬我小君齊歸。何休公羊注。歸氏。胡女史記集解引服虔曰。胡歸姓之國也。是胡非楚同姓。

一人立二碑皆書遠祖不書近代一載名字里一不載名字里例

山陽太守祝睦碑。君諱睦。字元德。濟陰太守已氏人也。其先蓋高辛氏之火正。以能淳耀天地曰祝融。遂獲豐阜之胙。輝裔昌遠。大乃侯伯。分仕諸夏。鄭有祝聃者。君其胤也。未載立碑姓名祝睦後碑。伊余祝君。兆自蔡

辛。祝融苗胄。承獲禎慶。光裔熾藐。分仕六國。張雄諸夏。鄭有祝聃者。君其胤也。昔祖仕湯。湯治於梁。洮頭

自朔家于濟陰。故吏王堂等立。隸釋。

一人立二碑皆書名字及遠祖近代一書近代名一不書近代名例

太尉陳球碑。君諱球。字伯真。有虞氏之裔也。當周盛德。有虞遏父爲陶。下公生公子完。適齊。爲桓公正。

其後強大。遂有齊土。楚漢。下官生毛有令名。廣漢太守。故吏立。陳球後碑。君諱球。字伯真。廣漢太守之元

子也。蓋周存六代。嫪滿繼虞。建國于陳。遂完祖齊。實爲陳氏公。下父自營州來宅海淮。末載立碑姓名。隸釋。

隸釋曰。水經注陳球墓前有三碑。是弟子管寧華歆等造。此碑所見。皆故吏故民。而無管華姓名。豈與劉寬碑相類。其一則弟子所立乎。陳公兩碑。皆在淮陽。水經謂墓前有三碑。似指碑陰爲一也。

一人立二碑一敘先世一不敘先世例

陳太邱碑先生云云。河南尹立。文範先生陳仲弓碑。其先出自有虞氏。中葉當周之盛德。有嫪滿者。武王配以

太姬。而封諸太昊之墟。是爲陳胡公。春秋之末。失其爵土。遂以國氏焉。世督懿德。令問丕顯。子紀立。蔡中郎集。

堂邑令費鳳碑。君體履柔和云云。妻弟下。弟立。費鳳別碑。君諱鳳。字伯簫。梁相之元子。九江太守之長兄也。世

德襲爵銀艾相亞

舅家中孫石勳立隸釋

隸釋廣漢屬國都尉丁魴碑不敍先世其有別碑與否無文以明之

一人立三碑兩碑敍名字先世一碑不敍名字先世例

太傅文恭侯胡公碑公諱廣字伯始交阯都尉之元子也

故吏池喜立

太傅胡公碑維漢二十有一世云云

掾王允等

立胡公碑公諱廣字伯始南郡華容人也其先自媯姓建國南土曰胡子春秋書焉列于諸侯公其後也

考以德行純懿官至交阯都尉

故吏許詡等立蔡中郎集

媯姓乃歸姓之誤見前左氏昭四年胡子始見於經杜注胡國汝陰縣西北有胡城胡在汝南故云建國南土

一人立三碑一略敍先世不載名字一詳敍名字邑里及先世一僅載名字例

司空文烈侯楊公碑曰漢有國師司空文烈侯楊公公惟司徒之孫太尉公之盾子

子彪立

漢太尉楊公碑

公諱賜字伯猷宏農華陰人姬姓之國有楊侯者公其後也其在漢室赤泉侯佐高丞相翼宣咸以聖德

光于前朝。祖司徒考太尉繼跡宰司。咸有勳烈。

屬吏立

文烈侯楊公碑。公諱賜。字伯猷。云云。

門人立蔡中郎集

水經注載橋元三碑。秦頡二碑。金石錄載郭臈二碑。文不全載。無以知其體例。

書薨例

太尉橋公碑頌。光和七年五月甲寅薨。

蔡中郎集

書卒例

文範先生陳仲弓銘。中平三年八月丙子卒。

同上

書不祿例

元儒婁先生碑。熹平三年二月甲子不祿。

集古錄

案隸釋作正月。至所載集古錄。仍作二月。疑正字誤。

孔德讓碣。永興二年七月。遭疾不祿。

同上

案謝本集古錄作一年。據隸釋及所載集古錄。並作二年。今從之。

曲禮。天子死曰崩。諸侯曰薨。大夫曰卒。士曰不祿。此常稱也。錄其一二以見例。不備錄。鄭氏注曲禮曰。自土顛壞曰崩。薨。顛壞之聲。卒。終也。不祿。不終其祿。正義崩者。墜壞之名。譬若天形墜。壓然。薨者。崩之

餘聲也。諸侯卑死，不得效崩之形。但如崩後之餘聲。卒，畢竟也。大夫是有德之位，仕能至此，亦是畢了平生。故曰卒。士祿以代耕，而今遂死，是不終其祿。曲禮又曰：壽考曰卒，短折曰不祿。鄭注：謂有德行，任爲大夫士而不爲者，老而死，從大夫之稱，少而死，從士之稱。案下不得兼上，故崩薨之稱，大夫以下不敢稱也。上得兼下，故春秋書他國君薨，皆曰卒。又左氏成十三年傳：呂相絕秦曰：無祿，獻公卽世，無祿，文公卽世。諸侯亦稱不祿。昭七年傳：子產爲豐施歸州田於韓宣子曰：日君以夫公孫段爲能任其事，而賜之州田，今無祿早世，大夫亦稱不祿，然則卒與不祿，又諸侯以下之通稱也。

書終例

陳太邱碑：中平三年八月丙子，遭疾而終。

蔡中郎集

隸續：封邱令王元賓碑，遭命而終。冀州從事郭君碑，晦習而終同。案檀弓：君子曰終，小人曰死。注：死之言漸也。事卒爲終，消盡爲漸。正義：君子之死，謂之爲終，言但身終，功名尙在；若小人之死，但謂之爲死，無功名可錄，但形骸漸盡也。按終死對文則別，散文則通。

書不瘳例

廷尉仲定碑：熹平元年孟秋上旬，君遭疾不瘳。

金石錄

隸釋、竹邑侯相張壽碑、遯疾無瘳同。

書丁憂例

太尉汝南李公碑、徵河南尹、母憂乞行、服闋奔命、

蔡中郎集

貞節先生范史雲銘、除郎中、萊蕪長、未出京師、喪母行服、

同上

右明書丁憂、水經注清水篇、桂陽太守趙越碑、

碑云、遭喪服闋

泚水篇、日南太守胡著碑、

碑云、遭母憂

隸釋博陵太守

孔彪碑、

碑云、遭大君憂服竟還署

廣漢屬國侯李翊碑、

碑云、遭從事君憂去官

太尉陳球後碑、

碑云、遭繼母憂、禮紀向闋、羣公爭招

安平相孫根碑、

碑云、遭公夫人憂服

闕微拜議郎、案碑云、司空公之伯子、故根之母稱公夫人、

涼州刺史魏元丕碑、

碑云、遭泰夫人憂服闋還臺

巴郡太守樊敏碑、

碑云、遭離母憂、五五斷仁、洪氏曰、五五與費鳳碑、五五同義、謂

二十五月也

隸續封邱令王元賓碑、

碑云、以母憂去官、服祥辟司空府

並書憂與李公碑略同、隸釋冀州刺史王純碑、

碑云、喪父服除復拜郎

衛尉衡方碑、

碑云、會喪大夫人、寢闇苦出、仍口上言倍榮向哀禮服、祥除微拜議郎

司隸校尉魯峻碑、

碑云、喪父如禮

太尉陳球碑、

碑云、喪母去官、服除辟司徒府

曜碑、

碑云、喪母服闋復爲郎中

並書喪與范史雲銘略同、

成臯令任伯嗣碑。除江州令。以服去官。金石錄

石渾書丁憂

丹陽太守郭昱碑。目父憂去官。還拜郎中侍御史。遭母喪服除。復拜郎中治書侍御史。續錄

右連書丁憂

案漢代近古。日知錄所載韋楊仁譙元戴封馬融陳實賈逵范滂劉衡圜令趙君曹

全度尙楊著陳重王純諸人。並以期功之喪。丁憂去官。其未載者。蔡中郎集。陳留太守胡公碑。遭叔父憂。以疾自免。隸釋。繁陽令楊君碑。會叔父太尉公薨。委榮輕舉。投骸如遺。隸續。司隸校尉楊淮碑。弟弼。西鄂長伯母憂去官是也。今人有能行者。是宜特書。以示旌異。然不數見。故不立例。又漢代尊舉主。持服去官。隸釋。太尉劉寬二碑。並云喪舊君去官是也。持服之事。雖始于管仲。見禮記雜記然非禮也。故不錄。

書告病例

太尉橋公碑頌。遷河南尹。遂陟司徒。託病遜位。起家拜尙書令。以疾篤稱。拜光祿大夫。後拜太尉。久病自

替。蔡中郎集下同

太傅文恭侯胡公碑。封安樂鄉侯。錄尙書事。稱疾屢辭。策賜就第。復拜司空。功成身退。俾位特進。又拜太

尉復以特進致命休神。又拜太尉。遜位歸爵。旋于舊土。徵拜司徒。疾病就第。汝南周巨勝碑。初以父任拜郎中。疾去官。察孝廉。是時郡守梁氏。外戚貴寵。非其好也。遂以病辭。

三碑皆屢稱引疾。疾輕而病重。包氏注論語曰。疾甚曰病也。鄭氏注曰。病。謂疾益困也。許氏說文曰。疾病也。病疾加也是也。故文先疾而後病。若僅一引疾。則但稱疾中。郎集司空楊公碑。見遭姦黨。用嬰疾。廢大尉汝南李公碑。功遂身退。以疾自遜。陳留太守胡公碑。遭叔父憂。以疾自免。皆單稱疾。此類甚多。不復備舉。隸釋泰山都尉孔宙碑。會遭篤病。告困致仕。梁相費汎碑。延究眉耆。被病係位。此則遭病而歸。旋即殞歿。故書病。吉成侯州輔碑。遷臧府令。後以病孫位。此則真病去官。故亦書病。巴郡太守樊敏碑。投核長驅。畢志枕邱。國復重察。辭病不就。云云。秋老乞身。以助義郡尉。養疾閭里。云云。此蓋先以真病辭官。後以微疾遜位。各書其實。與例不相妨也。

書歷年及卒年月日例

太尉橋公碑。春秋七十五。光和七年五月甲寅薨。

祭中郎集

郭有道林宗碑。享年四十有三。以建寧二年正月乙亥卒。

同上

朱學勤曰。郭林宗年。後漢書作四十二。碑文出重刻。疑誤。

衛尉衛方碑。年六十有三。建寧元年二月五日癸丑卒。集古錄

吳郡承武開明碑。壽五十七。建和二年十一月十六日。遭疾卒。金石錄

國三老袁良碑。載八十五。永建六年二月戊辰卒。見卷一

書春秋。書享年。書年。書壽。書載。各錄其一以見例。其有書歷年不書卒年月日者。梁相費汎碑。碑云。春秋八十

卒。葬釋書歷年及卒年不書月日者。太尉汝南李公碑。碑云。七十有六。嘉平四年。此蔡中郎集。廣漢屬國候生翊碑。碑云。年五十四。以

釋。書歷年及卒年時不書月日者。瑯琊王傅蔡公碑。碑云。年五十八。永興六年夏卒。蔡中郎集書歷年及卒年月不書日者。議

郎元賓碑。碑云。年四十八。延熹二年二月卒。金石錄南合趙君碑。碑云。年六十有八。以中平五年冬十一月卒。同上書歷年及卒年日不書月者。胡公碑。碑云。碑

年八十有二。建寧五年春壬戌。薨于位。蔡中郎集案胡公有三碑。其二碑有卒月。故此碑略之。文有詳略。無義例也。

書卒年月日及歷年閒以事蹟例

陳留太守胡公碑。建寧元年。召拜議郎云云。其年七月。被尚書召云云。其明二十一日。遣吏云云。是日疾

大漸刻漏未分。奄忽而卒。時年四十一。蔡中郎集

書歷年及卒葬年月日例

太傅文恭侯胡公碑。春秋八十二。建寧五年三月壬戌。薨于位。四月丁酉。葬于洛陽塋。蔡中郎集 又一碑云。維漢二十有一世。建寧

五年春三月既生魄。八日壬戌。太傅安樂鄉侯胡公薨。越若來。四月辛酉。葬我君文恭侯。見卷一

趙相劉衡碑。年五十有三。以中平四年二月戊午。卒。其四月己酉。葬。金石錄

此常例不備錄。其有書歷年不書卒年月日。書葬年月不書日者。司隸從事郭究碑。碑云。春秋二十八而卒。中平元年。歲在甲子。三

月而葬。集古錄書卒年月日。書葬年月不書日者。冀州從事郭君碑。碑云。君年卅一。以光和二年。大荒初。紙文有詳略。

無義例也。

渾書歷年例

丹楊太守郭旻碑。年過耳順。寢疾瘳頽。金石錄

渾書卒年例

巴郡太守樊敏碑。歲在汴治。紀驗期臻。奄忽臧形。隸釋

李翊夫人碑。歲在大淵獻。精魂奄昏。飛神天庭。收荆元都。同上

渾書卒例

武氏石闕銘。被病云歿。苗秀不遂。金石錄下同

祝長嚴訢碑。顛覆徂落。壽不寬宏。經設三命。君獲其央。

從事武梁碑。遭疾隕靈。

逢童碑。噓噏不反。天隕精晃。

郎中鄭固碑。遭命隕身。隸釋

書在官病卒例

淳于長夏承碑。建甯三年六月癸巳。淹疾卒官。金石錄

太傅文恭侯胡公碑。建寧五年三月壬戌薨于位。

見前

金城太守殷君碑。以光和元年九月乙酉卒官。

古文苑

綏民校尉熊君碑。以廿一年三月廿七日丙寅卒官。

隸釋下同

熊君碑上文有興平元年故不載年號。

益州太守高頤碑。建安十四年八月於官卒。

書致仕病卒例

北海相景君銘。去官未旬。病乃困危。珪璧之質。臨卒不同。

隸釋下及注同。病卒當書年月。此不書者。已見碑首。

愼令劉脩碑。素苦風痹。到官期月。見臣吏勅兒子。人命嚔吸。不欲煩擾吏民。欲生見舊土。歸終於家。百姓追逐。扣馬攢輪。遂不復還。建寧四年五月甲戌卒。

右致仕旋即病卒

泰山都尉孔宙碑。會遭篤病。告困致仕。得從所好。延熹六年正月乙未。

案闕處當是卒字。

司隸校尉魯峻碑。以病遜位。閉門靜居。晝書自娛。熹平元年□月癸酉卒。
安平相孫根碑。以疾去官。闔門守家。不競時榮。養育孤穉。以保壽年。上乾弗祐。獲疾固□□□以光和四年十二月乙巳卒。

右致仕久始病卒。國三老袁良碑。以病致仕。永建六年二月戊辰卒。囿令趙君碑。被疾去官。以中平五年冬十一月壬寅卒。梁相費汎碑。被病遜位。春秋八十卒。凡致仕旋即病卒。與久死病卒者。皆得通用。

書歸葬例

劉鎮南碑。時道路艱險。留墳州土。子授徵拜五官中郎將。乃疏上請歸本縣葬。見聽許。太和二年葬於先塋。蔡中郎集

朱公叔墳前石。延熹六年夏四月丁巳。卒于京師。其五月丙申。葬于宛邑北萬歲亭之陽。舊兆域之南。同上
案朱公叔碑。卒葬皆書地。劉鎮南碑。卒不書地。葬書地。文有詳略。不別爲例。

書不歸葬例

文範先生陳仲弓銘。昔者先生。甚樂茲土。築室講誨。精靈所寧。紀順奉雅意。遂定兆域。又一碑云。臨沒顧命。留邪所卒。蔡中郎集

後漢書張霸傳、遺勅諸子曰、昔延州使齊、子死、嬴博、因坎路側、遂以葬焉。今蜀道阻遠、不宜歸塋、可止此葬。足藏髮齒而已。崔駰傳、瑗臨終、顧命子寔曰、夫人稟天地之氣以生、及其終也、歸精於天、還骨於地、何地不可藏形骸、勿歸鄉里。寔奉遺令、遂留葬洛陽。梁鴻傳、疾且困、告主人曰、昔延陵季子葬子於嬴博之間、不歸鄉里、慎勿令我子持喪歸去。及卒、伯通等爲求葬地於吳、要離冢傍、此皆不歸葬之證。書合葬例

議郎胡公夫人哀讚、中平四年、薨于京師、願追惟考君存時之命、迎棺舊土、同穴此城。蔡中郎集

隸釋、相府小史夏堪碑、娉會謝氏、并靈合柩、古命有之、仲泥何忤、此周禮嫁殯也、不錄。餘叢考曰、合葬墓誌、近代如王遵巖、王弇州、集中皆書曰、某君暨配某氏合葬墓誌、識者非之、以爲古人合葬題不書婦、今日暨配某者、空同以後不典之詞也。考唐宋書法、並無合葬二字、但云某君墓誌而已、其妻之祔、則於誌中見之。陳君立曰、叢考謂始於空同、非也。唐太和時、徐府君墓誌、其額題徐府君劉夫人合祔銘、蓋始於唐。案叢考謂書合葬非古、是也。夏堪碑、不曰暨配謝氏、下文馬江侯成碑、同此漢碑定例也。胡公先葬、已有墓銘、夫人後葬、別爲哀讚、故與同時合葬者不同。書不合葬例

交趾都尉胡夫人黃氏神誥。自郡尉仕于京師。及廣兄弟。式敍漢朝。夫人居京師。六十有餘載。欲留此。康寧之時。亟以爲言。建寧二年薨。公銜哀悼。祇愼其屬。遵奉遺意。不敢失墜。乃俾元孫顯咨度羣儒。以考其衷。僉曰。昔帝舜歿於蒼梧。殯於虞郊。二妃薨於江湖。不卽兆於九疑。延陵季子。實惟吳人。長子道終。卜葬贏博。夫遭時而制。不遠遷徙。魂氣所之。不繫邱壠。於是公乃爲辭。昭告先考。然後卜定宅兆。十月既望。粵翌日己酉。葬我夫人黃氏于此高原。雒陽東界關亭之阿。

蔡中郎集

碑中兼敍妻德及卒年例

郎中馬江碑。夫人冤句曹氏。終溫淑愼。咸曰女師。年五十五。建寧三年十二月卒。

隸釋

不日者略之。非定例。

碑末附載妻卒年月日例

金鄉長侯成碑末。夫人目延熹七年歲在甲辰十一月三日庚午。遭疾終。

隸釋

碑稱侯成以建寧二年四月二日卒。碑末大書一行。夫人云云。當是夫人卒後合葬。書于碑末。與馬君碑同時葬同書于碑不同。

婦人墓碑書氏書字例

太傅胡公夫人靈表。夫人編縣舊族章氏之季女也。字曰顯章。

蔡中郎集 胡夫人黃氏碑
誌 議郎胡夫人哀讚並同

自周以前。姓氏各別。秦漢以後。姓氏不分。諸碑書氏不書姓。書姓不書氏。常例也。隸續司農劉夫人碑云。姓劉氏。書姓又書氏。蓋本史記五帝紀。姓姁氏。姁氏之文。古人文字重複。往往如此。然不可爲例。說文氏。巴蜀名山。岸脅之自旁箸。欲落墮者曰氏。氏崩聲聞數百里。象形。一聲揚雄賦。響若氏隕。段氏注曰。古經傳氏與是多通用。大戴禮。昆吾者衛氏也。以下六氏字皆是之假借。而漢書漢碑假氏爲是。不可枚數。故知姓氏字當作是。假借氏字爲之。是者分別之詞也。又說文女部。姚。虞舜。凡姚虛。因目爲姓。嬌。虞帝。凡嬌。因目爲氏。段注欲於氏下增姓字。云尋姓氏之禮。姓統於上。氏別於下。鄭駁五經異義曰。天子賜姓命氏。諸侯命族。族者。氏之別名也。姓者。所以統繫百世不別也。氏者。所以別子孫之所出。故世本之篇。言姓則在上。言氏則在下也。此由姓而氏之說也。既別爲氏。則謂之氏姓。故風俗通潛夫論。皆以氏姓名篇。諸書多言氏姓。氏姓之見於經者。春秋隱九年。天王使南季來聘。穀梁傳曰。南。氏姓也。南爲逗。氏姓也。三字爲句。此氏姓之明文也。史記陳杞世家。舜爲庶人時。堯妻之二女。居於嬌。其後因爲氏姓。姓嬌氏。五帝本紀曰。自黃帝至舜禹皆同姓。帝禹爲夏后。而別氏姓。姓姁氏。

契爲商姓子氏。棄爲周姓姬氏。此皆氏姓之明文也。左傳曰：陳胡公不淫，故周賜之姓，使祀虞帝。賜之姓者，賜姓曰姬也。段令嬌不爲姓，何以不賜姓姚而賜姓姬乎？凡言賜姓者，先儒以爲有德者則復賜之祖姓，使紹其後。故后稷賜姓曰姬，四岳堯賜姓曰姜，董父舜賜姓曰董，秦大費賜姓曰嬴，皆予以祖姓也。其有賜姓而本非其祖姓者，如鄭氏駁異義云：炎帝姓姜，大暉之所賜也。黃帝姓姬，炎帝之所賜也。是炎帝黃帝之先，固自有姓，而炎帝黃帝之姜姬，實爲氏姓之祖始。夏之姓姁，商之姓子亦同。然則單言姓者，未嘗不爲氏姓。單言氏者，其後以爲姓，古則然矣。至於周則以三代以上之姓及氏姓爲昏姻不通之姓，而近本諸氏於官氏於事氏於王父字者，爲氏不爲姓。古今之不同也。案說文以姚爲舜姓，嬌爲舜氏。左氏隱八年傳：天子建德，因生以賜姓。胙之土而命之氏。杜注：若舜生嬌，納賜姓曰嬌，封舜之後於陳，以所封之土命爲氏。舜後姓嬌而氏曰陳。據此是嬌爲舜姓，與說文異。說文是也。據說文，姓氏各別，不得於氏下增姓字。喪服小記：復與書銘，婦人書姓與伯仲，如不知姓則書氏。孔疏云：若妾有不知姓者，當稱氏矣。是姓氏不同之證。穀梁傳云：南氏姓也。傳意以南爲或氏或姓，不敢遽定。故云氏姓。范寧謂氏以爲姓，非也。陳杞世家曰：其後因爲氏姓。此誤襲穀梁之文。段氏從之，非也。風俗通：無氏姓篇：潛夫論：所志氏姓，其首略敍曰：凡厥姓氏，皆出屬而不可勝紀也。然則氏姓猶言姓氏，倒文耳。豈得以證穀梁哉？今本史記五帝本紀：帝禹爲夏后，而別氏姓姁氏。別氏下不重姓字。段氏作別氏姓。

姓姬氏。不知所據何本。恐臆說也。總之姓氏對文則異。散文則通。日知錄曰。春秋有姜氏子氏。姜子皆姓而云氏是也。史記所云姓姬氏。姓子氏。姓姬氏。此古人文字重複處。不及說文分別姓氏。最爲明晰。段氏反據史記以增改說文。非也。顧氏棟高春秋大事表。引元史伯璉曰。三代以後。無所謂姓。只有氏而已。故後世但曰姓某氏。而不敢曰某姓某氏。蓋姓不可考。故但虛其姓於氏之上。而實其氏於下。亮哉言乎。案如史氏之言。當於姓上空一字。既不空字。則非虛其姓於氏之上。顧氏以爲然。非也。

書繼室例

漢交阯都尉胡夫人黃氏神誥。初都尉君娶於故豫州刺史卽黃君之姊。生太傅安樂侯。及卷令康而卒。繼室以夫人。生童紀。未齠而夭。夫人撫育遺孤。導以義方。蔡中郎集

陳君立曰。左傳妻稱繼室。皆非敵體。如聲子繼室也。而春秋家謂隱母爲賤。晉少姜卒。傳稱妾寵之喪。而齊侯請繼室于晉。卽繼少姜也。其非嫡夫人可知。繼室稱夫人。其昉於漢代乎。

有官職者妻得統稱夫人例

漢交阯都尉胡夫人黃氏神誥。夫人江陵黃氏之季女云云。蔡中郎集下同

大傅安樂侯胡公夫人靈表。夫人編縣舊族章氏之季女也云云。

司徒袁公夫人馬氏靈表。維光和七年司徒袁公夫人馬氏薨云云。

議郎胡公夫人哀讚。議郎夫人趙氏字曰永姜云云。

周制天子有三夫人。諸侯之妻稱夫人。秦漢時三公稱公。其妻稱夫人。常例也。然子孫尊其先世。後進尊其鄉先生。不必三公亦稱公。不必夫人亦稱夫人。胡袁二公其妻稱夫人。此三公之妻稱夫人也。都尉議郎之妻亦稱夫人。此非三公之妻。亦得統稱夫人也。近世諸生之妻。及世族之婦。雖無官職。統稱孺人。蓋與此同。

敍婦人家世例

漢交阯都尉胡夫人黃氏神誥。夫人江陵黃氏之季女。其先出自伯翳。別封于黃。以國氏焉。高祖父汝南太守曾祖父延城大尹祖父番禺令父以主簿嘗證太守事。奉明君以立臣節。漢南之士。以爲美談。

蔡中郎集

同下

司徒袁公夫人馬氏靈表。夫人右扶風平陵人也。曾祖中水侯。祖將作大匠。考南郡太守中水侯弟伏波將軍。女在淑媛。作合孝明。誕生孝章。婚姻帝室。

婦人墓碑敍先世常例也。袁夫人靈表。伏波將軍之女。於夫人爲祖姑。而亦敍之者。以其爲太后。故大

書以示重。又此表不敍子孫。隸釋：李翊夫人碑，亦不叙子孫。蓋婦人立碑有二，或婦人先卒，其夫尚在，其子孫之數不可豫定，故不書。或夫已卒而婦人別葬，其子孫已載其夫墓碑，故亦不書。上文胡夫人神誥，書其所生子者，將敍其撫育前室子，故書下文子立母碑例。袁夫人碑銘，書其所生子者，碑爲其子立，故書。女立母碑例，胡夫人靈表，書其所生子者，將敍其諸子早卒，女爲立碑，故書。

書子孫官爵例

國三老袁良碑，時元子光、博平令、中子騰、尚書郎、少子璋，謁者，詔書壁□□可父事。彙司以君父子俱列

三臺云云，於是厥孫衛尉滂、司徒掾宏、闕通刊石作銘云云。隸釋

太尉楊震碑，長子牧、富波侯相、次讓、趙常山相、次秉，實能續脩，復登上司。陪陵京師，次奉、黃門侍郎、牧子統、金城太守、沛相、讓子著、高陽令。同上

書弟及子官爵事蹟例

綏民校尉熊君碑，君同產弟望季公。名望，字季公。質性忼慨，史魚之直，吏功曹列掾督郵都梁長，早終。君長子

冉孝存。名冉，字孝存。姿操敦良，耽志好學，博覽雅藝。□□曹列□三奏辟召於州終。隸釋

後漢書蔡邕傳注引邕祖攜碑云長子棧字伯直處俗孤黨不協于時垂翼華髮人爵不升年五十三卒諡法曰清白守節曰貞純行不差曰定此子先父卒於其父碑中詳載其子事蹟者但未及兄弟耳附錄於此

書孤嗣例

文範先生陳仲弓銘孤嗣紀云云

蔡中郎集

隸釋司隸從事郭究碑外黃令高彪碑並稱孤嗣按孤嗣猶孤子也變子言嗣者子兼男女之稱嗣則專指男也其實漢人亦稱孤子漢書嚴助傳孤子翫號是也曲禮孤子當室冠衣不純采鄭注謂年未三十者三十壯有室有代親之端不爲孤也深衣注亦云三十以下無父稱孤案鄭義本諸孟子王制然漢人撰文長幼俱得稱孤今世亦然該餘徵攷曰今人父亡稱孤子母亡稱哀子按古禮父母喪皆稱哀子不特爲母亡也孟子幼而無父曰孤故父喪亦稱孤子如魯康與山巨源絕交書少加孤露又趙彥深見母自陳幼小孤露此皆以無父言然雜記諸侯之禮他國弔含襚皆對曰孤某須矣曲禮諸侯在喪曰適子孤左傳列國有凶稱孤在喪也有凶也皆通乎父母之喪言之非專係乎父也宋書巴陵王休若傳謝沈居母喪自稱孤子賈榮傳榮丁母憂謂諸將曰孤子受先帝顧託本以死報今日當與諸護軍同死社稷是母喪亦稱孤子矣六朝人每言偏孤梁書韋叟父早卒叟少而偏孤事母以孝聞此父先亡者梁書裴子野生而偏孤爲祖母所養魏書裴延儻少偏孤事後母以孝聞此母先亡者謝貞傳貞以母憂毀瘠將歿謂姚察曰孤子登禍所集將隨灰壤時貞父已先亡此則父母俱亡者可見孤字之義本無定屬今世以孤屬父以哀屬母本於司馬溫公書儀按開元禮四品以下卜宅兆涖卜者命曰孤子某云云注曰今儀父及祖稱孤子孤孫母及祖母稱哀子哀孫則

孤哀之分稱，實始於唐，不自溫公始。宋政和禮，虞祭至大小祥祭，祝文父曰孤子，母曰哀子，亦不獨載之溫公書儀也。

碑文有稱孝嗣者，安平相孫根碑，有稱孝孤者，北軍中

候郭仲奇碑，有稱孝子者，北海相景君銘，從事武梁碑。

士虞禮，孝子某，特牲少牢禮，孝孫某，鄭注，士虞禮曰，喪祭稱哀，稱孝者，吉祭，案雜記，祭稱孝子，孝孫，喪稱哀子，哀孫，正義，

祭，吉祭也，謂自卒哭以後之祭也，吉則申孝之心，故祝辭云孝也，喪內祭，謂自虞以前祭也，喪則痛慕未申，故稱哀也，亦是則凡稱孝者，皆已葬之詞。

有稱遺孤者，博陵太守孔彪碑，故民吳仲

山碑，有稱咳孤者，淳于長夏承碑。

咳孤，即孩孤，說文，咳，小兒笑也，孩，古文咳，從子，內則，父執子之右手，咳而名之，釋文本作孩，云孩本又作咳，孝經，聖治章疏，引內則作孩，與釋文合，阮太傅禮記校勘記曰，惠

校宋本咳作孩，通典六十八，引亦作孩，然則咳孩一也，史記扁鵲傳，不能若是而欲生之，曾不可以告咳嬰之兒，終口，亦作咳字。

有稱孤生者，慎令劉脩碑。

以上諸碑，並見雜釋。

又有單稱孤者，

司空文烈侯楊公碑，朱公叔墳前石碑，議郎胡公夫人哀讚，又有稱孤而繫以數者，太尉橋公廟碑。

碑

三孤，以上諸碑，並見蔡中郎集。

又有單稱息者，司隸校尉魯峻碑。

隸釋，息，即子也，趙策，老臣賤息舒祺，後漢書，光武十王列傳，東海恭王彊，臨命上疏謝曰，息政，小人也，是也，許君宗寅曰，息，猶男女之

稱，東觀漢記，此蓋我子息也，是以子爲息，前漢高紀，臣有息女，願爲箕帚妾，是以女爲息，恭冕曰，梁武帝長安有狹邪行，大息組細縕，中息佩陸離，小息尙清綺，總轡游南皮，此亦女稱息者。

書哀子例

司徒袁公夫人馬氏碑銘，哀子懿達仁達云云。

蔡中郎集

儀禮士喪禮、筮者命曰、哀子某、爲其父某甫筮宅。洎卜命曰、哀子某來日卜葬其父某甫。士虞禮、始虞用柔日、曰哀子某哀顯相。夙興夜處不寧、再虞三虞如初。將旦而祔、則薦卒辭曰、哀子某來日某。隋祔爾于爾皇祖某甫。尙饗。女子曰、皇祖妣某氏。饗辭曰、哀子某圭爲而哀薦之饗。鄭注、喪祭稱哀。案此則哀者未祔以前之稱。考妣同之。故漢人據以入碑文。今世母歿稱哀。母存不得稱哀。乃唐開元以後之制。詳見前注。

書無子例

元文先生李子材銘、初娶配出、後配未字、年旣五十、苗盾不嗣。

蔡中郎集

公卿大夫爲卑官處士立碑例

陳太邱碑、河南尹种府君、追歎功德、述錄高行、重部大掾、以成斯銘。

蔡中郎集

貞節先生范史雲碑、太尉張公、兖州陳君、陳留太守淳于君、外黃令劉君、謀於耆舊、刊石樹銘。

同上

二碑於立碑人書姓不書名、尊之也。陳君以下、以張太尉故、同不書名。其實郡邑之長書名也。邑長爲邑人立碑例。

孝廉柳敏碑。建寧元年。縣長同歲。櫬爲屬國趙臺公。憤然念素帛之義。其二年十月甲子。爲君立碑。釋 隸

隸釋曰。柳君以本初元年死。後二十三年。縣令趙臺念其墓無碑識。故爲立石。

父母爲子立碑例

冀州從事郭君碑。哀哀考妣。追惟實靈。卜商號咷。喪子失明。金石錄

生稱考妣。今所不用。已見鉞。

戚伯著碑。父哀母悲。傷其□絕。隸釋

僚友立碑例

敦煌長史武斑碑。於是金鄉長河間高陽史恢等。追惟昔日。同歲郎署。故□石銘碑。碑末尙書丞沛國蕭曹芝云云。隸釋

隸釋曰。漢碑多門生故吏所立。至於同舍爲之者。唯武斑及柳敏兩碑。日知錄曰。今人以同舉爲同年。漢人已。有之。後漢書李固傳云。有同歲生得罪於冀。風俗通云。南陽五世公爲廣漢太守。與司徒長史段遼叔同歲。又云。與東萊太守蔡伯起同歲。又云。蕭令吳斌與司徒韓演同歲。三國志。魏武帝紀云。公

與韓遂父同歲孝廉同歲即今之同年。

姻戚立碑例

堂邑令費鳳碑。夫人元弟故□□□守卜詹追而誄之云云。

隸釋金石錄刪節，無故字以下五字。

費鳳別碑。金石錄，作費君碑陰。君舅家中孫甘陵石勳字子才載馳載驅來奔于喪庭不堪哀且思。敍詩之一篇云云。

同上 金石錄刪節作君舅家

中孫甘陵石勳字子才所述。

子立父碑例

司空文烈侯楊公碑。其孤彪敢儀古式。昭銘景烈。銘曰天鑒有漢云云。乃及伊公云云。

蔡中郎集

序文稱公。銘辭稱伊公。碑雖其子所立。而辭則撰人之稱。

文範先生陳仲弓碑。孤嗣紀銜恤在疚。遂宅兆域。宜有銘勒表墳墓。銘曰於熙文考云云。同上

序文稱君。稱先生。銘辭稱文考。又稱君。序文則撰人之稱。銘則代其子稱之也。文考二字。今人宜避。見敍下烈考同。

中常侍樊安碑。嗣子遷。實以幼弱。夙敍王爵。而喪所天。禮備復位。以延熹三年冬十有一月。自上烝祭。乃尋惟烈考恭脩之懿。勒之碑石。俾不失墜。古文施

鴻臚陳君碑。有子曰羣。追惟蓼莪罔極之思。乃與邦彥碩老。咨所以計功稱伐。銘贊之義。遂樹斯石。用監于後。同上

丹楊太守郭旻碑。諸子昂仰。三載禮闕。迺羣相與刻石勒銘。金石錄

司隸校尉魯峻碑。息叡不才。弱冠而孤。承堂弗構。所薪弗何。悲蓼莪同之不報。痛昊天之靡嘉。頽企有紀。

能不噓蓼。刊石敍哀。隸釋

司隸從事郭究碑。孤嗣叫號。涕零如雨。敢慕衛俚。讚先之義。乃伐石與碑。以旌厥魂。同上

以上五碑。皆子稱其父之詞。

子立母碑例

司徒袁公夫人馬氏碑銘。維光和七年。司徒袁公夫人馬氏薨。其十一月葬。哀子懿達。仁達。銜恤哀痛。靡

所寫懷。乃撰錄母氏之德履。示公之門人。覩文感義。采石於南山。謚之羣儒。假貞石以書焉。

蔡中郎集

孫立祖碑例

國三老袁良碑。於是厥孫衛尉滂。司徒掾宏。乃刊石作銘。其辭曰。飛清邈紛。其厲云云。

隸釋下同

淳于長夏承碑。咳孤憤泣。忉怛傷摧。勒銘金石。惟以告哀。其辭曰。於穆皇祖。天挺應期云云。

梁相費汎碑。適孫珣。感奚斯之義。刊銘元石。旌勒厥美。俾覽焉。其辭曰。穆穆顯祖。厥德懿鑠云云。

袁良碑。撰文者之詞。夏承費汎碑。卽其孫之詞。皇祖二字宜避見敘。祭法。顯考廟。注。顯。明也。正義。顯考廟者。高祖也。顯明高祖居四廟最上。故以高祖目之。案費汎碑稱顯祖者。自高祖至考皆得以顯明尊稱之。今世猶然。

女立父碑例

先生郭輔碑。其季女明文。潁川之夫人也。感惟考妣克昌之德。登山采石。致于墓道。邑人縉紳。刻石作歌。

隸釋

水經注曰。碑無年號。不知何代人。集古錄曰。碑以如爲。而及用鄉鄣字。與婁壽碑同。蓋漢人如此。隸釋

曰碑有兩昭字。晉人所諱。疑是魏刻。案碑有昭字。無以定其爲魏刻。今從歐陽氏。水經注清水篇云。清水南道側有二石樓。題言蜀郡太守姓王。字子雅。南陽西鄂人。有三女無男。而家累千金。父歿當葬。女自相謂曰。先君生我姊妹。無男兄弟。今當安神元宅。翳靈后土。冥冥絕後。何以彰吾君之德。各出錢五百萬。一女築墓。二女建樓。以表孝思。案子立父碑。常例也。若無子。女亦得立碑。王子雅女築石樓費至千萬。侈已極矣。其文當卽刊於石樓柱壁。是亦碑類。因附錄之。

人疑是項伯冢。案此冢無以定其爲封射陽項伯之冢。且其文太略。不可爲例。

又泗水上云。晉水又東。逕七女冢。元嘉六年大水填崩。得一磚刻云。項氏伯無子。七女造。擲世。

女立母碑例

太傅胡公夫人靈表。夫人生五男。長曰整。伯齊。次曰千億。叔韓。次曰寧。穉威。次曰頤。季叡。皆早卽世。元女金盈。追慕永思。遂立斯表。鐫著堅珉。

蔡中郎集

子立母碑。常例也。女立母碑。必夫人無子。或有子已故。故碑文特表出之。

碑文五男。而故者四人。其存者叡幼。

弟立兄碑例

郎中鄭固碑。琦瑤延目爲至惡不紀。則鐘鼎奚銘。昔姬□□武。弟述其兄。綜闕行於蔑陋。歎曷敢忘。乃刊

石目旌遺芳隸釋

王氏懷祖讀書雜誌載此碑文云昔姬公武句弟述其兄句綜□□□□行句於蔑陋句猷曷敢忘

乃刊石句目旌遺芳句於蔑陋者於音烏歎詞也蔑陋謂鄙小也鄭注君爽云蔑小也高注淮南脩務篇云陋鄙小也漢書韋元成傳

云於蔑小子與此於蔑陋同義兄行忘芳爲韻兄讀若荒行讀若杭隸辨以行於蔑陋四字爲句則既失其義而又失其韻矣

弟及子同立碑例

愼令劉脩碑二弟龍純攀哀孔懷孤生雋協郤長號思慕立此碑銘隸釋

子吏門人同立碑例

太尉橋公廟碑三孤故臣門人相與述公言行云云銘曰光光烈考云云蔡中郎集

廟碑入墓碑例者其例從同又以類相附後不更見子吏門人同立碑而銘詞稱烈考從其親者言也然今時宜避

門生爲師之祖父立碑例

太尉楊震碑。長子牧。牧子統。統之門人汝南陳熾等。緣在三義一。頗有清廟。故敢慕奚斯之追述。樹元石于墳道。隸釋

門生爲師之子弟立碑例

童子逢盛碑。年十有二。沒而不行。於是門生東武孫理。下密王升等。感敬三成。一列同義。故共刊石。敘述才美。碑陰五官掾崔孟祖云云。右縣中士大夫高密徐承興祖云云。右家門生。隸釋

隸釋曰。縣中士大夫。其父黨也。故不名是也。案盛乃童子。必無門生。碑稱門生。碑陰稱家門生。必是其父門生。漢人門生之稱。凡對其師家人言之皆然。

父子同塋立碑例

郎中鄭固碑。先是君大男孟子。有楊烏之才。年七歲而夭。故建□共墳。配食斯壇。目慰考妣之心。隸釋錢氏大昕金石文跋尾曰。喪服傳。不滿八載以下爲無服之殯。鄭君長男孟子。七歲而夭。乃建墳與固配食。此禮之過而失其中者。案錢氏所言是也。然可爲父子同塋立碑之例。

兄弟同塋立碑例

郎中馬江碑君中弟字文緒位主簿督郵志行

闕

期落落自有大節年卅二早世短折故塋迫芒

同

斯士隸釋

隸釋曰馬君元嘉三年卒建寧三年夫人曹氏卒

碑文見前

相去十七年又載其弟文緒年三十二早世當

是因夫人卜兆以馬君共塋又同時改厝其季故作碑併言之石有斷缺不能詳攷其云東看祖禰西瞻舊廬可見其塋以昭穆也隸續司隸校尉楊淮碑云故司隸校尉楊君厥諱淮字伯邳舉孝廉尙書侍郎上蔡雒陽令將軍長史任城金城河東山陽太守御史中丞爲尙書尙書令司隸校尉將作大匠河南尹伯邳從弟諱弼字頴伯舉孝廉西鄂長伯母憂去官復舉孝廉尙書侍郎遷注丞冀州刺史大醫令下邳相元弟功德牟盛當究三事不幸早隕國喪名臣州里去覆二君清頌約身自守俱大司隸孟文之元孫也黃門同郡卞玉字子珪以熹平二年二月廿一日謁歸過此追述勒銘故財表紀碑文全錄案碑題楊淮而兼敘其從弟弼又稱弼功德牟盛而不及淮爲淮立碑而詳略互異此例之變也當是淮弼二人共葬一塋因共立一碑而淮爲弼兄遂題爲淮其實因弼立也雜例中有兩人共立

碑，非以表墓，故此碑附錄於此。

婦祔姑墓例

太傅安樂侯胡公夫人靈表，建寧三年薨，夫人之存也，契闊中饋，婉孌供養，依生奉仁，紹述雅意，其閏月附于太夫人窆旁于茲地。蔡中郎集

孫祔祖墓例

交趾都尉胡夫人黃氏神誥，建寧二年薨于太傅府，是月辛酉，公之季子陳留太守碩卒于雒陽左池里舍。十月既望，粵翌日己酉，葬我夫人黃氏及陳留太守碩于此高原，雒陽東界關亭之阿。同上

公謂胡廣夫人乃廣母，碩乃廣子，夫人之孫，此孫祔祖母墓也。其孫祔祖父，書法亦同，故特著爲例。碩稱名者，以其祔祖母，又對其父稱之，禮所云父前子名也。

碑敍首總敍立碑人例

山陽太守祝睦後碑，故吏王堂等竊聞下有述上之功，臣有敍君之德云云。集古錄乃相與刊勒金石。隸釋

碑中敍立碑人爵里姓名例

太尉橋公碑。於是故吏司徒博陵崔烈、廷尉河南吳整等，乃共勒嘉石，永昭芳烈。蔡中郎集下同

太傅胡公碑。掾太原王允、鴈門畢整、扶風曾宙、潁川殷歷等，相與累次德行，撰舉功勳，刊之于碑。又一碑云：故吏濟陽

池喜、感公之義，乃樹石作頌。又一碑云：故吏司徒許詡等，論集行跡，銘諸琬琰。

太尉汝南李公碑。故吏潁川太守張溫等，刊石立碑，德載不泯。

太守胡公碑。於時陳留主簿高吉、蔡軫等，咸以郡選充備官屬，遂樹碑作銘，以表令德。彭城姜伯淮碑。弟子陳留申屠蟠等，乃建碑於墓。

此例甚多。中郎集外，不復詳引。其有渾敍立碑人，不書姓名者，太尉楊公二碑。楊秉碑云：於是門人學徒，相與刊石樹碑。楊賜碑云：惟我

下流，二三小臣，紀公勳績，刊石立銘。蔡中郎集下同。陳留太守胡公碑。碑云：於是遐邇縉紳，爰暨門人，相與數述君德，追痛不實，嗟我明哲，如何勿銘。郭有道林宗碑。碑云：凡我四方同好之人，永懷哀悼，於是

建碑表墓。翟先生碑。碑云：於是鄉黨乃相與銘景行。與登山伐石而勒銘。汝南周巨勝碑。碑云：遐邇欽悼，痛心失圖，乃相與建碑勒銘，以旌休美。金石錄：廷

度尚、金鄉長侯成、小黃門譙敏、渡儀令衡立諸碑略同。附錄於此，不別爲例。

碑中渾敍立碑人碑陰詳載姓名例

泰山都尉孔宙碑。於是故吏門人。乃共陟名山。采嘉石。碑陰門生鉅鹿瘦陶張雲字子平云云。隸釋下同

繁陽令楊君碑。故吏臣隸。適共追錄厥勳。鑄石示後。碑陰故功曹史闕故功曹史成功豫伯舉云云。

高陽令楊著碑。門徒小子。喪茲師范。故樹斯石。以昭厥勳。碑陰□□孫甫□鉅鹿時稚明云云。

吉成侯州輔碑。於是鄉人姻族。乃相與刊石樹碑。碑陰漢陽太守闕故京兆尹延篤叔堅云云。

凡碑陰書立碑人爵里姓名字。五者皆備。隸釋沛相楊統碑陰。懷陵園令相蔣禧字武仲。博陵太守孔彪碑陰。司徒掾博陵安平崔烈字威考。是也。孔宙諸碑。五者不備。文有詳略。無義例也。其有先書姓。次書爵。次書名。都鄉孝子嚴舉碑陰。向主吏諱曼云云。楊督郵諱鎮云云。楊侯同侯諱龐云云。趙掾諱護云。

云是也。隸續曰。鼎其姓於吏職之上。而以諱挈其名。漢碑他無此式。

碑中渾敍立碑人碑末夾注姓名例

衛尉衛方碑。於是海內門生故吏□□采嘉石。樹靈碑。碑末夾注門生平原樂陵朱登字仲。隸釋

碑中敍首立碑人碑陰敍同立碑人復書首立碑人例

沛相楊統碑故吏戴條等適鑑石立碑碑陰故□□郎中令□戴□字叔□故吏懷陵園令相蔣臯字

武仲云云

隸釋

博陵太守孔彪碑□吏崔□□王沛等乃刊斯石碑陰故吏司徒掾博陵安平崔烈字威考故吏齊□

博陵安平崔恢字行孫故吏乘氏令博陵安平王沛字公豫故吏司空掾博陵安國劉惠字伯桓云云

同上

碑陰載立碑人姓名同郡不書郡同縣不書縣例

元儒先生婁壽碑陰故五官掾婁□伯故守長史掾夏光淵云云

隸釋

吉成侯州輔碑陰漢陽太守下故京兆尹延篤叔堅故東平相溫貢顯宗云云

同上

司隸校尉魯峻斷碑陰闕延上闕文臺郝仲車彭城徐文達汝南袁彥和翟公勝仲孝安云云

隸釋

婁壽碑云南陽隆人魯峻碑云山陽昌邑人州輔碑其郡邑元闕隸釋曰婁壽碑陰可見者五十四人漫滅者四人其稱南郡汝南者二人餘蓋南陽人州輔碑陰自漢陽太守而下四十有九人其八人稱

邑曰冠軍、曰宛、曰章陵、曰新野、曰比陽、曰魯陽。皆南陽之邑。餘人唯延篤有傳。乃南陽擘人。則不稱邑者。擘之人也。碑云：鄉人姻族相與刊石。則又知輔爲擘人也。魯峻斷碑陰九十有一人書姓字而不名。惟徐袁二人有郡。婁壽碑陰不出郡者。皆同郡人也。州輔碑陰不出縣者。皆同縣人也。此殘碑實彭城汝南者各一人。則其餘皆山陽人也。

碑陰人名後各總標郡縣名例

太尉郭禧碑陰於立碑人姓名後云右河南、右河內郡、右宏農郡、右扶風郡。

金石錄

太尉劉寬碑陰門生名後云右河南郡、右河內郡、右河東郡、右京兆、右扶風郡、右馮翊郡、右南陽□、右□

川郡、右□國、右陳留郡。

隸續

右總標郡名。劉寬碑陰王曜以下有爵秩者皆特書爵郡縣姓名字。

碑云：故華陰令相國別部司馬漢陽河陽王曜等起云云。

左宮以

下無爵秩者各書縣姓名字。

碑云：河南左宮叔舉云云。

而總標郡名有爵詳無爵略又常例中之變例。

故吏應酬殘題名故吏應酬云云又一行右郛故吏舒苗云云又一行右江原。

隸釋

漢石例卷二

右總標縣名。

隸釋曰、郫江原皆隸蜀郡、此蓋蜀郡太守碑陰。

漢石例卷三

墓碑例

書故吏故民例

泰山都尉孔宙碑陰。故吏北海都昌逢祈字伯憲云云。故民泰山費淳于黨字季□云云。

錄

案統言則曰故吏。析言則有掾。有史。有令史。分以列曹。戶曹。

掾見濟陰太守孟郁修堯廟碑。華山亭碑。漢陽長潘乾校官碑。邵陽令曹全碑。史見孟郁修堯廟碑。孔廟置守

廟百石孔蘇碑。華山亭碑。樊毅修華嶽廟碑。淮源廟碑。潘乾碑。巴郡太守張納碑。堂邑令費鳳碑。學師宋恩題名。祀三公山碑。馮煥殘碑。少室石闕銘。開母廟石闕銘。陳德碑。竹葉碑。令史見張納碑。

奏曹。掾見蒼頡廟碑。史見張納碑。竹葉碑。令史未見。辭

曹。掾未見。史見張納碑。

宋恩題名竹葉碑。法曹。掾見張納碑。史見張納碑。宋恩題名曹全碑。

尉曹。掾見張納碑。都鄉正衛彈。賊曹。掾見中部碑。史見張納碑。宋恩題名曹

全碑。中部碑。竹葉碑。令史見馮煥碑。

案武氏石室題字。單稱賊曹。未分掾史。宛令李孟初神祠碑。有賊捕掾。即賊曹掾劉郡造橋碑。有荷賊曹掾。隸釋於荷字未詳。韓勅造孔廟禮器碑。有相中賊史。謂相府中賊曹史。

決曹。掾未見。史見張納碑。竹葉碑。兵曹。掾見張納碑。史

題名馮煥碑。令

金曹。掾見張納碑。中部碑。史見張納碑。宋恩題名曹全碑。中部碑。

倉曹。掾見蒼頡廟碑。史見張納碑。蒼頡廟碑。中部碑。

案後漢書百官志。公府掾十二曹。其

十已見碑文。惟西曹東曹罕見耳。公府者。太尉司徒司空三公之府。總稱府掾。元儒先生妻壽碑。吉成侯州輔碑。析稱太

尉掾。靈臺碑。魯相韓勅造孔廟禮器碑。華嶽廟殘碑。司徒掾。靈臺碑。仙人唐公房碑。司空掾。華嶽廟殘碑。此十曹外。又有祠曹。掾見孔鮒碑。史未見。議曹。掾見潘乾碑。張納碑。呂國題名。

史見若。曹曹。掾史並見。集曹。掾見張納碑。蒼頡廟碑。史見張納碑。供曹。掾史並見。比曹。掾見張納碑。史見。獻曹。掾未見。史見張納碑。宋恩題名。塞

曹。掾未見。史見。水曹。掾未見。史見宋恩題名。廣漢太守江堰碑。客曹。掾未見。史見馮煥碑。士曹。司空孔扶碑。單言士曹。未分掾史。令史見馮煥碑。不見於志。案志

戶曹主民戶祠祀農桑。祠曹即戶曹。奏曹主奏議事。議曹即奏曹。尉曹主卒徒轉運事。漕曹即尉曹。倉

曹主倉穀事。穀曹即倉曹。志又云。將軍其職吏部集各一人。總知營事。集曹即部集。又云。客曹尚書主

外國夷狄事。則客曹掾史。即尚書屬吏。繫以所屬之官也。酸棗令劉熊碑。郡曹史郡列掾韓勅造禮器碑相史。蒼頡廟碑。少府史唐公房碑。太守史。劉熊碑曹全碑。郡曹史曹

全碑將軍令史。郭究碑。額司隸從事並繫以官。志又云。公府掾比古元士三命。或曰。漢初掾史辟。皆上言之。故有秩比命士。其所不

言。則爲百石屬。是士曹乃諸曹中之聞於朝比命士者。別於不命。故曰士曹。惟供曹比曹。獻曹塞曹水

曹。無文以明之。志又云。署諸曹事。掾史屬二十四人。以十二曹計之。每曹掾史各一人。而漢碑掾。則有

右金曹。右賊曹。中部碑。史則有左戶曹。右戶曹。左賊曹。竹葉碑。右賊曹。中部碑。左決曹。右決曹。作葉碑。左金曹。張納碑。

右金曹張納碑、左倉曹張納碑、右倉曹張納碑、中倉曹中郎碑、左漕曹、右漕曹、右集曹、右兵曹張納碑、外兵曹馮煥碑。是每曹

掾史各四人。有中外左右之殊。十二曹當有九十六人。與志文不合。疑漢末不能如制。碑文又有祠祀

掾無極山碑、白石神君碑、鑾廟掾少室石闕銘、開母開母、當即戶曹、門下議掾史掾見曹全碑、史見北海相景君碑、靈臺碑門下議生同。當即奏曹。又有郵

書掾曹全碑。案志、法曹主郵驛科程事。則郵書即法曹志。又於司隸校尉云。從事史十二人。考諸漢碑。司

隸中都官從事北軍中候郭仲奇碑。志云。都官從事志云。與志同。河隄從事吉成侯。與志異。又兖州從事韓勅碑、冀州

豫州從事韓勅碑、益州從事唐公房碑、張納碑淳于長夏承碑、荊州從事桂陽太守周懷功勳銘、冀州從事張表碑。即志所云郡國從

事。志又云。假佐二十五人。考漢碑有功曹書佐蒼頡碑。與志同。又有決曹書佐沛相楊。案志於太尉下云。決

曹主罪法事。於司隸校尉下云。都官從事主察舉百官犯法者。則決曹書佐。當即都官書佐。又有單稱

從事雲臺碑、鄧季宣碑樊毅修華獄碑、周單稱書佐。北海相景君碑西嶽華山廟碑。文不備也。別有治中從事王純碑。志云。州刺

史功曹從事爲治中從事是也。其郡縣掾史。志云。凡郡國歲盡遣吏上計。又云。有功曹史。五官掾。五部

督郵曹掾門亭長主記室史諸曹各有書佐幹注引漢官員吏中有案獄仁恕監津渠漕水掾文學守

助掾循行幹小史考漢碑有上計掾史掾見張納碑夏承碑掾史並見南陽太守秦頡碑功曹史淮源廟碑張納碑繁陽令楊君碑宋恩題名李孟初神祠碑荇頡廟碑陳德碑竹葉碑曹

全碑案樊毅修華嶽廟碑劉熊碑華山廟殘碑荇頡廟碑武氏石室

題字曹全碑亦單稱功曹楊君碑又策稱處士功曹疑皆指功曹史五官掾靈臺碑淮源廟碑博陵太守孔彪碑呂國題名祀三公山碑少室石闕銘開母廟石闕銘荇頡廟碑武氏

石室題字劉熊碑東部督郵唐公房碑南部督郵周愷銘張納碑竹葉碑中部督郵張納碑北海相景君碑竹葉碑北部督郵竹葉碑靈臺碑都鄉

題字曹全碑單亭長魯王墓前石人刻字案公府以下正門俱有亭長此亭長稱督郵文不備屬郡國故列於此又案志亭有亭長此鄉亭之長與門長別主記史淮源廟碑潘乾碑費鳳碑中部碑著

主史疑並同又靈臺碑陰鄭季宣碑皆與志合又有直事干鄭季宣碑諸曹干司馬整碑干即幹漢人僭干爲幹王氏昶金

有主吏未知即主史否主記書佐鄭季宣碑皆與志合又有直事干鄭季宣碑諸曹干司馬整碑干即幹漢人僭干爲幹王氏昶金

史記麻書作干古證省爲干是也後漢書蔡邕傳雖幹更卑未皆誤令習讀注幹府吏之類也管令諸郡國不滿五千以下置幹吏二

人郡縣皆有幹幹猶主也北海相景君銘幹作午隸釋曰百官志載郡縣吏屬自曹掾之下有書佐有循行有幹有小史此碑故午

六人在循行小史之間隸文幹字其旁中部案獄仁恕張納碑志注引漢官河南尹員吏案獄仁恕三人此云都水掾

从一从干或从一从午午是幹字省文中部案獄仁恕張納碑志注引漢官河南尹員吏案獄仁恕三人此云都水掾

西嶽華山廟碑即監津渠漕水掾都水西漢時官名東漢省志於少府下云都水屬郡國知都水即此職文學主事掾張納碑即文學守助掾循行北海相景君碑即循

行金石錄曰後漢書百官志注河南尹官屬有循行一百三十人而管書職官志州縣吏皆有循行此碑作循行豈循循字蓋相類

遂致訛謬邪隸釋曰循循隸法只爭一畫書碑者好奇從省借用都氏穆金華琳耶曰碑刻于漢而後漢書舊皆傳錄以循爲循

傳錄之誤趙氏不信碑本而信漢書且復引晉書爲證不知晉書脩於唐其本曰循行蓋仍漢書之誤案趙氏洪氏從後漢書以循行爲正郡氏從碑文以脩行爲正未知孰是姑從趙洪

小史

繁陽令楊君碑北海相景君碑夏墟碑額相府小史與此小

史同但繁以官耳

卽幹小史與志亦合然志但有主記室史而碑文復有主記掾

張納碑著

又張納碑既有主記

掾復有錄事掾曹全碑亦有錄事掾然不與主記掾並列蓋頡頏碑復有錄事史

既有文學主事掾復有文學史文學主事史鄭季宣碑既有

主事書佐復有門下書佐

楊統碑北海相景君碑亦有門下書佐然不與主記記室錄事諸書佐並列繁陽令楊君碑門下佐卽門下書佐

記室書佐錄事書佐既有直事

小史復有門下小史豈志不詳歟抑漢末不能如制歟志又云凡縣諸曹略如郡員五官爲廷掾鄉置

有秩三老游徼考漢碑有廷掾

祀三公山碑少室開母廟石闕銘

有有秩都鄉正衛彈碑呂國題名有衡官有秩蓋有秩兼爲衡官

有三老

武氏石室題字楊信碑額作縣三老以

別於國三老也

有游徼

同上游徼亦名督盜賊若頡頏碑有督盜賊志云游徼掌徵循禁司盜盜是督盜賊卽游徼張納碑又有府後督盜賊豈此職亦有前後左右耶

與志文合然武氏題字有游徼

又有門下游徼其爲同異未可知也又郡縣吏有將作掾史

掾見華山亭碑祀三公山碑少室石闕銘史見華山亭碑帝堯碑守堯掾將作吏卽將作掾

道橋

掾漢安長陳君閣道碑蜀郡造橋碑

鑒市掾

張納碑武氏題字曹全碑市掾同又鑒臺碑都市掾官都即都水掾市即鑾市掾

教化史

著頡頏碑皆不見於志又有

行義掾

韓勅碑。北海相景君碑行義同。

仁德掾

無極山碑。

孝義掾

宋恩題名。

未知所掌之職。抑褒美之稱。今並無文明之。又學官屬

吏有業掾。易掾。尙書掾。詩掾。春秋掾。議掾。文學掾。文學孝掾。

學師宋恩題名。

並不見於志。此則志文闕也。又諸

吏皆得稱門下。門下掾。

華山亭碑。呂國題名。曹全碑。

門下史。

潘乾碑。繁陽令楊君碑。鄒季宣碑。費鳳碑。陳德碑。曹全碑。

門下議掾史。門下書佐。門下小史。

見前。

門下祭酒。

曹全碑。祭酒非職名。蓋一曹之長。

門下賊曹。

費鳳碑。蒼頡廟碑。武氏題字。曹全碑。

門下功曹。門下游徼。

費鳳碑。蒼頡廟碑。武氏題字。

門下督盜賊。

北海相景君碑。

此則諸吏統稱。非別有職掌也。

掾史之副名屬。亦名副。亦名佐。樊毅復華下民祖田口算碑。掾臣條。屬臣淮。是名屬也。史長

佐。是名佐也。後漢書志云。東西曹掾。比四百石。餘掾比三百石。屬比二百石。注。引漢書晉義。正曰。掾副曰屬是也。注又引漢官員吏中有佐。與此別。未即真者名守。孔祿碑守文學掾。裴詠碑守長史掾。張納碑守屬是也。其待次未授職者名從。潘乾碑張納碑蒼頡廟碑

從掾位。呂國題名從史位。益州太守無名碑從史。漢書兒寬傳。顏師古注。從史者。但只隨官僚不主文書是也。蜀郡造橋碑有從吏。爲掾爲史。未可知也。其稱從則同。亦稱待。張納碑待事掾。并也。蒼頡廟碑有持事。即待事之譌。其一人而居二職者名兼。郭子真宅舍

殘碑兼掾。是也。

歐趙洪三家。於諸員吏未嘗攷訂。因爲辨析。附錄於此。其故民析言之。亦有義民。

靈臺碑。衛長蔡洪碑。隸釋曰。

占籍者曰故民。素非所蒞曰義民。案此說非也。堂邑令費鳳碑有義民堂邑咸忠。忠爲所蒞而

復民。韓勅碑。漢時凡除田租徭役皆曰復。故謂其民曰復民。前漢

文帝紀復晉陽中都民三歲租。後漢光武帝紀建武十九年復南頓田租。此復田租也。建武五年詔復濟陽二年徭役。六年改春陵鄉爲章陵縣。世世復徭役。此復徭役也。若田租徭役俱除。則但曰復。前漢高祖紀十一年令豐人徙關中者皆復終身。令士卒從入蜀關中者皆復終身。十二年吏入蜀漢定三秦者皆世世復。晉書曰復謂除其賦役也。是也。又除口算亦曰復。樊毅有復華下民租田口算碑是也。賤民議民。蔡湛碑。金石錄曰。議民賤民莫詳其義。又民之無字者以阿

挈其名爲字。與有字者相配。仲東阿東。

靈臺碑。碑又云仲阿東仲阿先仲阿同。

劉奉阿奉。劉興阿興。

散阮君神祠碑。隸釋曰字其名稱以阿書石者欲其整齊而強

加之。猶今閭巷之婦以阿挈其姓也。是也。並附錄。

書門生門童弟子不同例

泰山都尉孔宙碑陰門生鉅鹿瘞陶張雲字子平云云。門童安平下博張忠字公直云云。弟子北海劇陸

暹字孟輔云云。

隸釋

集古錄曰親受業者爲弟子。轉相傳授者爲門生。隸釋曰以久次相傳授曰門生。未冠曰門童。總而稱之亦曰門生。日知錄曰後漢書賈逵傳皆拜逵所造弟子及門生爲千乘王國郎。是弟子與門生爲二。漢人以受學者爲弟子。其依附名勢者爲門生。邾壽傳時大將軍竇憲以外戚之寵威傾天下。憲常使門生齎書詣壽有所請託。楊彪傳黃門令王甫使門生於京兆界辜椎官財物七千餘萬。憲外戚甫奄

人也。安得有傳授之門生乎。又曰。南史所稱之門生。今之門下人也。宋書徐湛之傳。門生千餘人。皆三吳富人之子。資質端妍。衣服鮮麗。每出入行游。塗巷盈滿。謝靈運傳。奴僮既衆。義故門生數百。南齊書劉懷珍傳。懷珍北州舊姓。門附殷積。啓上門生千人。充宿衛。孝武大驚。其人所執者。奔走僕隸之役。管書劉隗傳。周嵩嫁女。門生斷道。斫傷二人。建康左尉赴變。又被斫。南史齊東昏侯紀。丹陽尹王志。被驅急。狼狽奔走。惟將二門生自隨。后妃傳。門生王清。與募工始下插。劉瓛傳。游詣故人。惟一門生持胡牀隨後是也。其初至。皆入錢爲之。宋書顏竣傳。多假資禮。解爲門生。充朝滿野。殆將千計。梁書顧協傳。有門生始來事協。知其廉潔。不敢厚餉。止送錢二千。協怒。杖之二十。南史姚察傳。有門生送南布一端。花練一疋。察厲聲驅出是也。故南齊書謝超宗傳云。白從王永先。又云。門生王永先。謂之白從。以其異於在官之人。陳書沈洙傳。建康令沈孝軌。門生陳三兒。牒稱主人翁。顏氏家訓。亦以門生僮僕並稱。而宋書顧琛傳。尙書寺門有制。八座以下。門生隨入者。各有差。不得雜以人士。其冗賤可知矣。劉昭傳。不私蓄門生。蓋所以矯時人之弊。陔餘叢考曰。漢時門生。本非弟子之稱。後漢書楊厚傳。門生上名錄者三千餘人。曰上名錄。則不必親受業。但習其學卽是也。鄭康成傳。康成沒。門生相與撰其問答諸弟子之詞。依論語爲鄭志。以弟子問答之詞。而門生撰述之。蓋如論語所謂門人受業于弟子者也。李固傳。固下獄。門生王調貫械。上書證其枉。及固死。陳屍於路。固弟子郭亮負鉢。乞收固屍。曰。門生曰。弟子又

可見門生之非弟子也。惟其不必親受業，但爲其學者，皆可稱門生。於是依勢趣利者，並不必以學問相師，而亦稱門生。蓋卽後世拜門生之陋習也。又曰：唐以後始有座主門生之稱。六朝時所謂門生，則非門弟子也。其時仕宦者，許各募部曲，謂之義從。其在門下親侍者，則謂之門生。如今門子之類。宋書：王微嘗將門生兩三人入山采藥。南史：庾子輿之官巴陵，病篤不肯入廨，因勸門生不許輒入城市。何敬容罷官後，起爲侍中，其舊時賓客門生，喧譁如舊，冀其復用。臧嚴爲武寧郡守，以數門生單車入境。北史：崔彥精於醫，廣教門生，令多救療。此數者，以之移作門弟子，尚可通。至如沈慶之、佐孝武起兵，元凶劭使慶之門生錢無忌齋書，使之解甲。慶之執以見孝武，薛安都降魏，大見禮重。至於門生，無不收殺。慶之、安都皆武人，目不知書。若如後世受業弟子，安得有此？又謝靈運因祖父之業，奴僮既衆，義故門生數百，繫山後湖，功役無已，則并用之功役矣。王僧達爲吳郡守，西臺寺多富沙門，僧達遣主簿顧曠率門義劫寺，得數百萬。門生義從也，則並用之劫掠矣。劉義宗坐門生杜德靈放橫打人，免官。德靈以姿色故，義宗寵之，則又取其妾媚矣。宋孝武責沈勃周旋門生，競受賄賂，少者至萬，多者千金，則并大收其賄賂矣。又徐湛之謀逆，謂范蔚宗曰：「已報臧質，悉攜門生義故前來，故應得健兒數百，則并用之叛逆矣。」合此數事以觀，則門生不過如僮僕之類，非受業弟子也。其與僮僕稍異者，僮僕則在私家，此蓋在官人役，與胥吏同。顧琛傳：琛以宗人顧碩寄尙書張茂度門名，而私與碩同席坐，乃坐籬。

益可知門生者正如胥吏之類也。然富人子弟多有爲之者。蓋其時仕宦皆世族。而寒人則無進身之路。惟此可以年資得官。故不惜身爲賤役。且有出財賄以爲之者。陸慧曉爲吏部尙書。王晏典選內外要職。多用門生。義故慧曉不甚措意。王琨爲吏部。自公卿下至士大夫。例用兩門生。江夏王義恭屬用二人。後復用有所屬。琨不許。此可以見當日規制也。顧亭林旣謂六朝門生與僉僕同。而謂其非在官之人。則未知門生有可入仕之路。不得謂非在官人也。許君宗寅曰。後漢書桓榮傳。顯宗幸太常府。令榮坐東南。設几杖。會榮門生數百人。又云。每大射養老禮畢。輒引榮及弟子升堂執經。一曰門生。一曰弟子。是門生與弟子無別也。又牟長樓望各傳。所言門生。實卽弟子。顧氏趙氏皆不引。蓋亦難於置辨也。案門生弟子對文則別。散文則通。史傳所載甚多。不備錄。

書處士與德行好學不同例

酸棗令劉熊碑陰。處士宋口仲博云云。好學尹闕云云。德行蘇倉子盈云云。錄

處士義見卷一。碑陰書處士有二例。韓勅造孔廟禮器碑。河南成皋蘇漢明二百其人處士。此以處士繫於姓名之下。又云處士魯劉靜子著。此以處士加於姓名之上。又有稱處士友者。見元儒先生婁壽碑。蓋壽之友也。隸釋曰。處士之後。有好學四十餘人。必泮官之後進。以處士爲丈人行者。其間有德

行一人。必是嘗貢孝察廉者。案後漢書和帝紀注引漢官儀曰。建初八年。詔書辟士四科。一曰德行高妙。志節清白。是德行一人。乃儲以應辟者。非嘗貢孝察廉也。國語齊語管子曰。正月之朝。鄉長復事君親問焉。曰。於子之鄉。有居處好學。慈孝於父母。聰惠質仁。發聞於鄉里者。有則以告。是好學乃人材之目。非後進也。

書清白士與聘士不同例

高睽石室題名。清白士云云。娉士云云。

隸續土
即士字

書清白士與書德行一也。後漢辟士四科。一曰德行高妙。志節清白。見前左雄傳。鄉部親民之吏。皆用儒

生清白任從政者。傳論漢初詔舉賢良方正。州郡察孝廉秀才。中興以後。復增敦樸有道賢能直言獨行高節質直清白敦厚之屬是也。其以清白待辟見於史者。馮緄傳。弟允清白。蔡邕傳。父棧有清白行。

呂布傳。高順爲人清白。周澤傳。孫堪清白貞正。樓望傳。操節清白。李郃傳。弟子麻清白有節是也。漢以清白

課士。亦以清白課吏。安帝紀。元初六年。詔選孝廉郎。寬博有謀。清白行高者五十人。延光元年。詔舉刺史二千石。令長相清白愛利有益於人者是也。其居官清白見於史者。度尙傳。文陟刺史張磐。以清白稱。朱暉傳。遷泰山太守。因上便宜。詔報曰。補公家之闕。不累清

白之素斯善美之士也。楊震傳轉涿郡太守。性公廉不受私謁。子孫常蔬食步行。曰使後世稱爲清白吏。孫謝該傳少府孔融上書薦之曰竊見故公車司馬令謝該清白異行此以清白課吏之驗。聘士當是曾經徵辟而未就者。

義士及弟子統名諸生服義例

謁者景君碑陰諸生服義者義士北海劇張敏字公輔弟子濟北往平寧尊字伯尊云云。

釋錄

金石錄曰漢時墓碑多門生故吏所立往往各紀姓名於碑陰或載所出錢數其非門生故吏而出錢者謂之義士。隸釋曰掾屬曰故吏。占籍曰故民。非吏非民曰處士。素非所莅曰義士。金石文字記曰處士者德行可尊之人。義士則但出財之人而已。今人出財布施皆曰信士。宋太宗朝避御名凡義字皆改爲信。今之信士卽漢碑所稱之義士也。案今之信士賤民亦得稱之。此義士在弟子上。又統名諸生當是好義之士。與今之濫稱信士有別。又義士與義民同。

義民見前注

但一稱士一稱民耳。所洩之民得稱

義民。

見前注

義士亦然。洪氏謂素非所莅曰義士非也。義士爲尊稱。故諸碑書法與諸生別。此統云諸生

服義蓋雖未受業必是弟子行也。

書分子例

義井碑陰分子云云。

錄釋

此非墓碑。以類相從。故錄於此。隸釋曰。碑陰稱五大夫者三十一人。稱分子者六十人。漢承秦制。爵二十級。其九爵曰五大夫。漢末以貲受爵。比屋皆然。此碑五大夫所以若是之衆也。惟分子未詳。穀梁曰。燕周之分子也。注云。燕召康公之後。分子謂周之別子孫也。陸德明音義。分本或作介。姚氏肅云。分子當是別子。古別字作介。故傳本或作分。或作介。皆以古字形近而誤。范寧時傳本未誤。故注云。謂周別子孫也。唐以後其文舛失。故疏解失之。案分子即別子。不必改從作介。范注明云。分子無從知。范本爲別子。漢時諸碑皆作分子。豈皆形近之誤耶。姚說非。景北海碑。鴟梟不鳴。分子還養。蓋用家富子壯則出分之語。謂惡逆之鳥。鉗喙無聲。外饗之息。歸奉三牲也。耿勳碑。脩治狹道。分子效力。謂正丁已供差徭。分子亦來助役。此碑分子似指土豪出分之子。三碑皆與穀梁合。

分書奔喪持服例

王元賞碑陰載門生姓名云。右奔喪右斬杖三年。

金石錄

奔喪禮也。持服非禮也。此因書奔喪而類及之。非以持服著爲例也。金石錄曰。聖人制禮爲可繼也。禮曰。事師無犯無隱。服勤至死。心喪三年。孔子之喪。門人疑所服。子貢曰。昔者夫子之喪顏淵若喪子而無服。喪子路亦然。請喪夫子。若喪父而無服。漢人爲王君乃爲斬衰之服。於禮無乃過乎。隸續。景北

海碑陰行三年服者。凡八十七人。除餘叢考曰。苟爽爲司空。袁逢所辟有道。不應及逢卒。爽制服三年。桓鸞爲太守。向苗所舉孝廉。除膠東令。始到官而苗卒。鸞卽去官奔喪。終三年。此爲舉主持服者。王吉被誅。屬吏桓典收斂歸葬。服喪三年。劉瓚以冤死。王允爲瓚吏。送喪還其家。終三年。乃歸。此爲長吏持服者。後魏書。公孫邃爲青州刺史卒。佐吏疑所服。詔曰。主簿近代相承。服斬過葬。使除。可如故事。自餘無服。殊覺寥寥。可齊衰三月。則感恩知己。私自制服之例。且上達朝聽。至發詔爲定令矣。由叢考之言推之。漢末門生故吏持服。必是時王之制。故景北海之歿。持服至八十七人之多。然非周孔所許也。又案漢書龔勝傳。門人衰絰治喪者百數。後漢書荀淑傳。淑卒。李膺時爲尙書。自表師喪。陳寔傳。年八十四卒。海內赴者三萬餘人。制衰麻者以百數。延篤傳。以師喪棄官奔赴。孔昱傳。以師喪去官。李邵傳。門人馮冑制服心喪三年。此弟子爲師也。樂恢傳。仕本郡吏。太守坐法誅。恢奔喪行服。恢死。弟子縯絰輓者數百人。傅燮傳。聞所舉郡將喪。乃棄官行服。童恢傳。聞舉將喪。棄官歸。此士大夫爲舉主也。皆叢考所遺。

分書某代門生例

高陽令楊著碑陰題名云。右後公門生。右沛君門生。

集古錄

隸釋曰。沛君。沛相統也。後公。太尉秉也。楊震拜于前。故以秉爲後。沛君者。著之從兄。後公者。著之李父。

碑文自標撰文人姓名例

處士園叔則碑。臨沒顧命曰。知我者其蔡邕。乃爲銘載書休美。蔡中郎集

顧命二字。今人宜避。見敍。水經注。睢水篇。漢廣野君廟碑。延熹六年十二月。雍邱令董生。命縣人蔣照爲文。用章不朽之德。此亦碑文自標撰文人姓名。附錄於此。廟碑例不更見。

碑文首書撰文人姓名碑末書立碑人姓名又系以詩詩後又列同立碑人姓名例

堂邑令費鳳碑。於是夫人元弟故□□□守卜。增追而誄之。其辭云云。碑末故吏故郭施業字世堅。義民堂邑戚忠。忠年十有一。慈考早隕。喪云云。門生功曹徐侃字元節云云。釋

碑文渾書撰文人碑陰詳列立碑人末作四言詩敍故吏持服行喪之事例

北海相景君銘。於是故吏諸生乃作誄云云。隸釋碑陰。故中部督郵都昌羽忠字定公云云。碑陰末。堅建□

□。惟故臣吏。慎終追遠。諒闇沈思云云。隸續

諒闇二字。今人宜避。見敍。

碑文中敍詔册例

國三老袁良碑。帝御九龍殿。引君對覲。與酒飯。賜飲宴。冊曰云云。

釋錄

吉成侯州輔碑。君懷立聖主。有安社稷之勳。建和二年七月己巳。詔冊云云。

同上

碑文中敍贈卹例

太尉劉寬碑。天子閔悼惻怛。內發手筆爲策。□涕咨嗟。使右中郎將張良持節臨弔。贈車騎將軍印綬。位特進。賜珪。贈綬。有加典禮。復使五官中郎將何夔持節。諡曰昭烈侯。

釋錄

碑文中敍哀誄例

陳太邱碑。大將軍弔祠。錫以嘉諡。曰徵士陳君。秉嶽瀆之精。苞靈曜之純云云。太守南陽曹府君。命官作誄曰。赫矣陳君。命世是生云云。

蔡中郎集

碑文但錄詔冊不復撰文例

漢安帝賜豫州刺史馮煥詔。告豫州刺史馮煥云云。末一行元初六年十二月。

釋錄

碑文載詔書常例也。此無上下文。但錄詔書。與袁良諸人碑異。此石當亦是立於墓前。今人墓石全刊。

誥贈之文此其權輿。

碑末或陰附錄詔冊例

中常侍樊安碑末制詔中常侍樊安云云末書延熹元年八月二十四日丁酉下。古文苑

詔書在元年立碑在三年詔書當入碑文而繫於末例之變。

費亭侯曹騰碑陰惟建和元年七月廿二日己巳皇太后曰云云制曰云云。隸釋

隸釋曰前一篇就國策書乃梁太后臨朝時後一篇乃褒贈策書。

碑末補書先世例

執金吾丞武榮碑文末君卽吳郡府卿之中子敦煌長史之次弟也。隸釋

碑末附載他人例

綏民校尉熊君碑末故長沙茶陵長文春字季秋宵操貞良慈仁汜愛治天官日度風角列宿明知聖術在官脩德民歌遺風春秋七十以道殞遷宗膺不紀故爲宣昭故桂陽陰山豫章長重安侯相杜暉字慈明體質宏亮敦仁好道治易梁邱春秋公羊氏綜覽百家無所不甄典歷三城居官清惠遺愛在民春

秋六十終族後闕術故因顯德以示來胤隸釋

隸釋曰碑後載文杜二人官壽行事各數十言似是同郡盛德之士作文者惜其無所記錄故附之左方

有誌無銘例

袁滿來墓碑茂德休行日袁滿來太尉公之孫司徒公之子起乃假碑旌于墓表嗟其傷矣惟以告哀止

蔡中

郎集

車騎將軍馮緄碑君諱緄字皇卿幽州君之元子也起故刊石表績以誌來世止隸釋後有數語敘孝悌得證之由據隸續碑式與碑文不相

連蓋碑末附錄

有銘無誌例

王史威長銘明明哲士知存知亡崇隴厚壘非寧非康云博物志

京兆尹樊德雲銘於顯哲尹誕德孔彰膺帝休命謂篤不忘云云蔡中郎集

古人誌銘不必一人作，或作誌，或作銘，故二者不備。

誌文接入銘詞，不標詞曰銘曰等字例。

太尉楊公碑，於是門人學徒相與刊石，樹碑表，勒鴻勳，讚懿德，傳億年。於戲公，惟嶽靈，天挺德，翼至神云。

蔡中郎集

太守胡公碑銘，於時陳留主簿高吉、蔡軫等咸以郡選充備官屬，乃相與衰經庭位，號咷靈柩，遂樹碑作銘，以表令德。於藐下國，瞻仰俊乂，欽見我君，爰綏我惠云。同上

中郎集又載瑯琊王傳蔡公碑、彭城姜伯淮碑、貞節先生范史雲碑、元文先生李子材碑、議郎胡公夫人哀讚，例並同，不備錄。

自作誌銘例

杜鄴臨終作文曰：魏郡杜鄴，立志忠款，犬馬未陳，奄先草露，骨肉歸于土，魂無所不之，何必故邱，然後卽化。長安北郭，此焉宴息。西京雜記

趙岐久病，勅兄子立石刻曰：漢有逸人，姓趙名嘉，有志無時，命也奈何。後漢書本傳

生題石槨例

延年益壽槨題字。永初七年四月三十日造焉。是萬壽延年益壽槨。續隸

歿題石槨例

景君石槨銘。惟元初四年三月丙戌。景君卒。以五年二月□□□□。釋隸

陔餘叢考曰。唐書鄭欽說傳。梁任昉。于大同四年七月。在鍾山塘中得銘曰。龜言土。善言水。旬服黃鍾。啓靈祉。瘞在三上庚。墮遇七中巳。六千三百浹辰交。二九重三四百圮。當時莫有解者。戒子孫世世以此訪人。昉五世孫。寫以問欽說。欽說方出使。得之于長樂驛。行三十里至敷水驛。乃悟此塚葬以漢建武四年三月十日。圮以梁大同四年七月十二日也。解在欽說傳內。則漢時銘墓。又有此一種。蓋卽莊子所謂石槨銘之類。

生壙碑末夾注年歲及其子名爵工師姓名例

梁相孔耽神祠碑末。夾行注云。子得述父。臣得錄君。故紀焉。時君年七十二。自所立作。君子颯。作內至。室即

字漢人時。已更郡諸曹史督郵。承詔紀行。手自注石。治師同縣朱適。朱祖。并作畜郭。隸
省筆

隸釋曰：碑末有小字數十，敍孔君之年，及其子歷官，與石工姓名。碑文云：定吉兆於天府，覩工匠之所營，心欣悅於所處。又有子得述父之句，則是孔君自作壽藏，而厥子刊石也。自營擇墓，始見於禮記檀弓所載。宋桓魋事壽藏之名，始見於後漢書趙岐傳，又稱壽家，見宦者侯覽傳。李賢曰：稱壽者，取其久遠之意也。猶如壽宮壽器之類。

墓碑中兼敍他石畫象及雕畫工人例

從事武梁碑：孝子仲章、季章、季立、孝孫子儁，選擇名石，南山之陽，擷取妙好，色無斑黃，前設礪祖，後建祠堂。良匠衛改，雕文刻畫，羅列成行，攄騁技巧，委蛇有章。隸釋

隸釋曰：此碑長不半尋，廣纔尺許，既無雕畫技巧，亦非羅列成行，其辭決不爲碑設，似是指石室畫象案礪與壇同，硯與墀同。左氏襄十八年正義云：尙書爲三壇同墀，王肅本墀作坦是也。

祔葬穿中石柱題詞例

張賓公妻穿中二柱文：一書維兮，本造此窆者張賓公妻、子偉伯、伯妻孫陵。在此右方曲內中，一書維兮，張偉伯、字長仲，以建初二年六月十二日，與少子叔元俱下世，長子元益爲之祖父窆中造內柄柱作屋棺葬父及弟叔元。隸釋 穆案 窆皆翁之諱

隸釋曰、本張賓公之妻之穴、其子偉伯及偉伯妻與其孫陵、皆祔葬右方曲內中、故志之、其一則偉伯之孫元益、葬其父並弟叔元所志也、其云建初二年、亦埋銘之椎輪、

石室題詞例

孝堂山石室題字、泰山高令明、永康元年十月廿一日、敬來觀、記之、平原濕陰邵善君、以永建四年四

月廿四日來過此堂、叩頭謝賢明、

金石
萃編

高睽石室太守張景題字、光和六年四月太守張景云云、又博士題字、議采夫、以詩書發、京師云

云、又宏農太守張君題字、故孝廉云云、又題名、土成都杜宣字管偉云云、

隸
續

石室詳下廟碑例注、案後人謁前人墓、題名石室、因記年月、如孝堂山石室題字、常例也、若高睽石室題字、張景之追遠、博士及宏農太守之通經、並刻於睽石室中、

隸續曰、張景題字、在高睽石室梁上、中有追念先
祖、早失覆口、孤覺自悲、紀刊先象之句、相去尺許

有少子早殤之文、前有治郡二字、蓋張君追遠之詞、博士題字亦在石室中、中云、以詩書發、京師受業春秋、口口仲舒、智非胡母、末云、道爲國師、出典方州、忠著金石、張君題字亦在石室中、其文有著德義方、襲父紹業、春秋尙書、海內歸高之句、與前一人皆是以經家者、當是門生故吏、恐其無聞、刊紀德業、此如綏民校尉熊君碑、附載文杜二人也、在題辭中爲變例、

石人刊字例

魯王墓石人胸前題字。一府門之卒。一漢故樂安太守廩君亭長。

金石萃編

牛氏運震金石圖曰。魯王墓前東側。一石人介而執戈。高五尺。腰圍七尺。刻曰府門之□。一石人冕而拱手立。頷下裂文如滴淚痕。高五尺五寸。腰圍七尺五寸。胸列漢故樂安太守廩君亭□十字。兩石人並肩西向。翁氏兩漢金石記曰。予得拓本諦審之。府門之下是卒字。亭下是長字。案廟中亦有石人。水經注穀水篇。漢廣野君酈食其廟。有兩石人對倚。北石人胸前銘云門亭長。附錄於此。後不更見。

案。穆

後魏酈道昭。雲峯山中石人。胸前題字曰。石人名髡髯。

石獸刊字例

吉成侯州輔冢石獸。一刻辟邪。一刻天祿。

水經注金石錄。後漢書注。載宗資墓石獸同。見注。

水經注滻水篇曰。州苞冢有兩石獸。人有掘出一獸。左膊上刻作辟邪字。金石錄曰。吉成侯州輔。見後漢書宦者傳。酈道元以輔爲苞。誤。其一辟邪。道元所見。其一乃天祿字。案漢書西域傳。烏弋山離國有

桃拔。孟康曰：桃拔一名符拔，似鹿長尾。一角者或爲天祿者。

案此者字衍，當在下文兩角下。

兩角或爲辟邪。此言桃拔之

一角者，或名天鹿。桃拔之兩角者，或名辟邪也。亦有無角者。後漢書章帝紀：章和元年，月氏國遣使獻扶拔師子。李賢注：扶拔似麟無角，和帝紀：章和二年，安息國遣使獻師子扶拔。扶拔卽符拔。古玉圖譜載辟邪形，有一角二角三角無角者，蓋分言之。則無角者亦是符拔，不名辟邪。名辟邪者二角，名天鹿者一角。通言之，則一角二角三角無角皆可名辟邪也。圖譜又載天鹿有兩角三角之異，兩角卽辟邪而名天鹿。博古圖載周辟邪鐘凡六，其第三鐘紐兩辟邪，左右像各露一角。第五背面像各有二角。又車輅托輦凡二，一左面一右面，各露一角。漢辟邪鐘二，並露兩角，一角卽天鹿而名辟邪。是天鹿辟邪亦通稱也。圖譜所載雖多，後人僞作，然皆仿古鐘鼎文爲之，亦自有所本也。州輔家列二石獸而變鹿爲祿者，鹿與祿古字通，且取其吉也。隸釋載魏大饗碑云：白虎青鹿辟非辟邪之怪獸。隸續載李氏鏡銘云：白虎辟邪主除道。又曰：鏡有二獸，奮迅挈攬。二獸卽白虎辟邪也。詩騶虞：毛傳云：騶虞，白虎黑文。此鏡刻一爲騶虞，一爲桃拔之兩角者也。後漢書靈帝紀：修玉堂殿，鑄天祿蝦蟆。李賢注：天祿，蝦蟆吐水于平門外，事具宦者傳。今鄧州南陽縣北有宗資碑，旁有兩石獸，鐫其膊，一曰天祿，一曰辟邪。據此卽天祿辟邪並獸名也。漢有天祿閣，亦因獸以立名。案李說是也。水經注：沔水中蔡瑁冢前刻石爲大鹿狀。

甚大。頭高九尺。大鹿疑爲天祿。一角二角。未有明文。又汲水篇。隧前有師子天祿。其制亦同。

交趾刺史石羊刻字。□趾刺史□君羊。隸續

隸續曰。士人謂之鄧君冢闕。蓋墓道石羊膊上所刻。

种氏石虎刻字。光和七年四月五日己丑。孝子种覽元博所造。同

案漢人墓前祠廟碑闕石人石獸之制。史無明文。水經注清水篇。漢桂陽太守趙越墓。冢北有碑。碑東又有一碑。碑北有石柱石牛羊虎。又陰溝水篇。特進費亭侯曹嵩冢北有碑。碑北有廟堂。廟北有二石闕。高一丈六尺。闕北有圭碑。碑陰又刊詔策。二碑文同。夾碑東西列對兩石馬。高八尺五寸。案此二墓祠廟碑柱石獸皆在冢北。其墓當是北向。趙越冢前有碑。碑前石柱石獸。曹嵩冢前有碑。碑前石廟。廟前石闕。闕前復有碑。又俠以二碑二石馬。此其異也。又洧水篇。漢宏農太守張伯雅墓。塋域四周壘石爲垣。隅阿相降。列於綏水之陰。庚門表二石闕。夾對石獸於闕下。冢前有石廟。列植三碑。碑側樹兩石人。有數石柱及諸石獸。舊引綏水南入塋域而爲池沼。沼在丑地。皆蟾蜍吐水。石隍承溜。池之南又建石樓。石廟前廟常作樓又翼列諸獸。案此墓西向。故冢前石廟。廟前碑。碑側石人石柱石獸。又前石闕。闕下

又列石獸。其右爲石樓。樓前又列石獸。其水由南而北。繫帶墓域。歸墟於丑。洵佳城也。又睢水篇。漢太尉橋元墓。冢東有廟。冢列數碑。廟南列二石柱。柱東有二石羊。羊北有二石虎。廟前東北有二石駝。駝西北有二石馬。又滎水篇。漢安邑長尹儉墓。冢西有石廟。廟前有兩石闕。闕東有碑。闕南有二獅子相對。南有石碣二枚。石柱西南有兩石羊。案此二墓皆南向。橋元冢前碑。冢東廟。廟前石柱。柱左迤北至廟左。皆列石獸。尹儉墓塚對文。墓者其葬處。冢者封土爲壇。詳後墳壇石例廟在二者之間。廟南石闕。闕南獅子石碣。闕東有碑。卽在冢前。乃壇碑也。西南石羊。卽在墓前。此其異也。又案瓠子水篇。仲山甫冢西有石廟。羊虎傾低。破碎略盡。豈此制已仿於周。而漢人增飾之與。

記冢地例

真道冢地碑。欲負冢土。勿取冢地中。法取東吉利。慎勿取西北土也。云云。延熹五年七月中旬。真道。字直中。以錢八千。從有親真敖。字政直。直弟政升。升二從弟。漢中市冢地廣廿二丈。云云。子孫但得宿山居留。不與爭舍地。云云。後冢東行廣五丈。北行不得作冢。可示後世冢前也。後世作冢。從此冢後。併墳北行。門出西口地也。隸續

爾雅釋親。族。兄弟之子。相謂爲親同姓。此云有親。親同姓也。併墳之併。與竝同。顏師古漢書武帝紀注。

竝讀曰傍。傍依也。音步浪反。史記秦始皇紀。竝陰山。竝渤海。竝河。竝即傍。蕭君令裕曰。紹興漢大吉碑云。兄弟六人。共買山地。建

初元年。造此冢地。直三萬錢。此亦記冢地也。碑首書大吉二字。附錄於此。不更爲例。

冢地書向例

郎中馬江碑。故瑩迫芒北。告斯士先君之庚地。隸釋。士即土字。

梁氏玉繩誌銘廣例云。堪輿家羅經之術。見於文中。漢以來有之矣。

